

Roma

Paulo âiŋaet keiŋe.

1 ¹Galalupne, nâmâ Paulo Yesu Kristogât hoŋ bawa manman. Nâ âmâ Kristoŋe menekmâ aposolo nogonmâ Anutugât pat âlep den maktere ârândâŋ akmâ ariâkgât mem kepilânegep. ²Akto Anutugât den pat âlep are âmâ Anutuŋe tâmbâŋe dondâ propetelupŋe makyenŋimbo kulemgoyi. ³Kulemgoyi aregât keiŋe amâ Anutugât nanŋe miawagep. Yâk âmâ hâk olop miawakmâ Dawidigât hakulupŋe yâk yenŋâlânba miawagep. ⁴Gârâmâ Heak han kau kau akmap arekŋe kârikŋe akmâ yâk amâ Anutugât nanŋe hain miawakmâ maknengiep. Aregât keiŋe momoŋânba agalewân miawakmâ tek tekŋân miawakto âmâ Yesu Kristo amâ Humonenŋe dâm nânŋâyion. ⁵Yâkŋe âmâ han kalem aknengim aposologât âi nengiep. Nengim âmâ yâkgât kotŋe patŋe ariâk gât akto hânŋe hânŋe arim hârok makyenŋienŋe bikŋande nânŋâm Yesu nânŋaŋmâ aregât lauŋe lokowaigât âi nengiep. ⁶Akto Anutuŋe Yesu Kristogât kâmot miawagâk dâm oloŋyegep yâk yenŋâlânba ye gai hainâk oloŋyegep.

⁷Roma kepiân gâtŋe Anutuŋe han kalem akyenŋim nânŋât kâmot dâm yenŋonlep. Yenŋât âmâ hin ulilaŋdân. Ewenenŋe Anutu akto Humonenŋe Yesu Kristo han kalem akmâ damun yenŋim akbela han kalem akto lumbe yenŋâlân hâtikom yendo biwiyenŋe sândugewiâp. Hain.

Pauloŋe Roma luâk âmbâle yekberâm magep.

⁸Galalupne yeŋe Yesu nânŋaŋmâ kepilâm manmai, aregât pat sambelembo nânŋâmbiâ ârândâŋ aktâpgât Yesu Kristogât akmâ nâ Anutu mepaiŋe mem mandân. ⁹Nâ Anutugât nanŋaet pat âlep den makmâ hannande Anutu manaŋdere keine nânŋâp gât yâkgât metenân den ire makyenŋire nânŋâŋet. ¹⁰Nâ hokboâk hokboâk yenŋât akmâ Anutu ulilaŋman. Akto Anutuŋe nânŋâmbo ârândâŋ akto dâp peneniŋdo yenŋâlân togowian a gai ulilaŋman. ¹¹Nâ togom ye yekbiangât nânŋâm mandân. Togom yekmâ han biwiyenŋe yeuk agep aregât owâiwaigât meme akyenŋire kârikŋe kinmâ manŋetgât makyenŋim tânyenŋuwian.

12 Tanyengum âmâ nâ yengâlân manmâ tateru Yesu nânganmâ manmaengât maganji goanji akmâ tân agu agu akmâ manbaen.

13 Galama, nângât keine pâpkowâigât hin makyengiwe. Nâ luâk kâmotje kâmotje bikje bikje arim makyengim mandere bikjande nângâmbiâ âinaet bunje âlim yiepgât miawaknijep. Are hainâgâk yengâlân togom makyengire âigât bunje miawaknijabiap gât nângân. Gârâmâ togowerâm akmâ malân ain siâ siâ bikjande hikonekto bo togoân. 14 Dâ nâne luâk hârok, Girik luâk akto Anutu bonânganmai akto nângâ nângâ luâk akto kopaje hârok makyengiwan gât âi tatniñdâp aregâlâk nângân. 15 Aregât Roma luâk ye hainâgâk pat âlep makyengiwerâm hannande owâim manman. 16 Nâ den pat âlepgât akmâ anunje olop bo akman. Akmâ nângâre anunje olop bo akmap. Den pat âlepne amâ Anutugât kârikneje olowâk arekne luâk âmbâle Yesu nânganbiâ ârândân mem menâleyekbiap, Yuda luâk a soj akto Girik luâk hârok. 17 Den pat âlep arekne âmâ Anutugât ârândân dâp mem miawakmâ tek tekjân miawakmâ katmap. Amâ hin. Yesu nânganbiâ âmâ Anutuje yekto ârândân akbiapgât keije. Akto nânganbiâ Anutugât ârândân dâp yem âgâwiap. Aregât Anutuje makto kulemgoyi bikje hin tatâp, Anutuje yekto ârândân akmap yâkne âmâ Anutugâlâk nânganmâ manmâ âgâwai.

Luâk hârokne Anutu hamianji.

18 Anutugât kuk miawakmap aregât keije hin. Luâk âmbâleje âmâ Anutu hepunmâ bâleje akmâ den bunje bo agâkgât kei dâpne gulip komai. Aregât Anutugât kukjande himbimân ba miawakyengimap. 19 Akto Anutuje ikiye keije bikje tektekjân mem miawakyengimapgât ekmâ nângâmai. 20 Amâ Anutuje hân liulewânbak Anutugât keije luâkne bo ekmai are akto keije kârikne manmâ âgâwiap are akto ikiye keije pagaleje are hârok miapjân tatmap. Are âmâ wan me wan Anutuje mângim ketuguep arekne hekatnengimap. Aregât luâk âmbâle hârokne nen Anutugât keije bo nângâmaen dâwaigât dâp bo tatâp. 21 Luâk âmbâle hainare âmâ Anutu mandâp nângâmai. Gârâmâ imâ Anutu Humo dâm bo kângoanmai akto mepaje bo meajmai. Anutu hamianmaigât nângâ nângâ yeje gulip akmap akto biwiyenje hândâkne katip yengumap. 22 Akto ainba hin dâmai, “Nen nângâ nângâ nenje humo aktâp.” dâmai amâ nângâm hilipkomai. Nângâm hilipkom sinduk akmâ manmai. 23 Hain akmâ manmâ Anutu manman kârikne yâkgât pagaleje hâkân akmâ âmâ aregât dumjân tukup siâ ketugum luâk momai yengât otneyeje me lâut gât otneje me songo gât otneje me mulumgât otneje mângim âmâ are nângâmbiâ humo akto pâwut ligiyengimai. 24 Hain akbiâ Anutuje yekmâ hâkân akyengimbo hanyeje egâlijan gulip bâleje akmâ han hâkyeje mem bâlimai. 25 Yâkne Anutu bundâk amboje hamianmâ âmâ

hiangimaigât nângâmbiâ humo akmap. Hain akto Anutuŋe wan me wan yân liulep are nângâmbiâ bunŋe akto hoŋ agaŋmai gârâmâ wan me wan aregât Amboŋe amâ hâkâŋ akmâ hamiaŋmai. Amâ Anutuŋe egâlianŋ olop manmâ âgâambo nânganŋdenŋe humo akmâ âgâwiapgât ârândân akmap. A bundâk. ²⁶Gârâmâ luâk âmbâle are Anutuŋe hepunyekto egâlianŋ bâleŋe dondâ peniaŋmai. Hain akto âmbâleŋe luâkdâ âmbendâ aregât agak meme âlepŋe are hepunmâ âmbâleâk egâlianŋmai. ²⁷Akto luâk hainâk luâkdâ âmbendâ manman hâkâŋ akmâ hanyeŋe egâlianŋgât kâlâp humo ondo luâgâk yekmâ egâlianŋmâ agak meme bâleŋe agaŋgimai. Aregât han biwiyenŋe hilip komapgât hâuŋe Anutuŋe hâkyenân pando hâk hilâlâm nângâmai. ²⁸Hain akmâ manmâ âmâ Anutugât keiŋe nângâmai are hâkâŋ akmâ manmaigât Anutuŋe hanyeŋe gisap kombo siâ me siâ bo agakŋe are âmâ akmai. ²⁹Hain akmâ siâ me siâ bâleŋe keiŋe keiŋe membiâ âgâmap. Bâleŋe akmâ egâlianŋ bâleŋe akmâ hanyenân bâleŋeâk nângâm galagât nângâmbiâ gembo kuk heŋgân akmâ luâk bikŋe yeŋgumbiâ moyi dâ bikŋe yeŋgât kotyeŋe mem bâlimai. Akto galagât hogo hogo akmâ haminâŋen makmai. ³⁰Hain akmâ luâk siâgât agak meme âlepŋe ekbiâ gembo hianŋi den makbiâ kotŋe gemap. Hain akmâ Anutu gasa agaŋmai. Akto âgâ âgâŋe akmâ yeŋe hâk mem agatmâ bâleŋaet dâp egâlianŋmai. Hain akmâ ewe memelupyenŋaet den komai. ³¹Hain akmâ han nângâ nângâ bâlâk manmâ Anutu bo nânganŋmâ âmâ han kalem bâlâk manmai. ³²Hain akmâ âmâ Anutugât den ârândân kârikŋe yendâp amâ luâk me âmbâle hain akbiâ âmâ momogât dâp miawakyeŋgiwiap gât den are nângâm metembiâ hanâk dâm bâleŋeâk manmâ âgâmai. Akto areâk bo. Bikŋande hainâk akbiâ nângâmbiâ humo akto heronŋe akyeŋgimai.

Bâleŋaet hâuŋe hamepŋe.

2 ¹Aregât gâ yu kulengoân are oyaŋmâ nâ hain bo akman dât mon? Hain bo. Yeŋe hain are akmâ siânba hâkyeŋe tunbiâ âmâ bo ârândân akmap. Akto yeŋe siânba hâkyeŋe tunmâ agak meme bâleŋe hainâk mem âmâ yeŋe hâkyeŋe tunanŋiwai. ²Anutuŋe luâk âmbâle bâleŋe akmai denân katyekmâ hâuŋe umatŋe yeŋgimbo âmâ ârândân akmap nângâmaen. ³Aregât gâ luâgâk aregât luâk bikŋe yeŋgât dosa makmâ hâkyeŋe tunmâ areâk akmat gârâmâ agak meme bâleŋe hainâk akmat. Aregât nâ Anutuŋe gâunniŋmâ âmâ umatŋân bo katnekbiap dâmat mon? Hain bo. ⁴Anutuŋe han kalem akmâ unsambe akgiŋmâ bo hâkâŋ giŋmap aregât hâkâŋ akmâ manmat mon? Anutuŋe gâ hange purik kat dâm han kalem akgiŋmap are bo nângâm kotgâmat mon? ⁵Gârâmâ gâ han kârik akmâ hange bo purikatmenâ âmâ Anutugât kuk metŋe ârândân are miawakbiawân ain om bâlidgekbiap. ⁶Aregât sopŋân Anutuŋe luâk âmbâle agak meme nenŋaet dowân hâuŋe nengiwiap.

Hain. ⁷Luâk âmbâle bikñande âmâ pagalenjaet pat akto Anutuñe nenekto huraguâkgât manman kârikñe egâlianmai are Anutuñe manman kârikñe yenggiwiap. ⁸Dâ luâk âmbâle bikñe âmâ den kautñe bunñe hâkân akmâ âmâ bâleñe mem manne dâm yeñaet nângâmbiâ humo akmap yengâlân âmâ kuk metñe bâleñe miawak yenggiwiap. ⁹Bâleñe meme luâk hârok Yuda luâk soñ akto Yuda gâtñe bo manmai gai yengâlân sik sererek metñe akto hamep humo miawakyenggiwiap. ¹⁰Gârâmâ ârândân akmâ manbai hârok Yuda luâk are akto Yuda luâk bo manmai yâk Anutuñe pagaleñe yengimbo biwiyenñe sândugembo patyenñe ârândân akmâ âgâwiap. ¹¹Are amâ Anutuñe yengiep. Anutuñe amâ horat gorat bo akmâ potat yekmap.

¹²Akto luâk âmbâle bikñe Anutugât den kârikñe Moseñe kulengoep den are bâlâk manmâ âmâ bâleñe memai amâ yâk hârok den kârikñe bâlâk bâlim metewai. Dâ den kârikñe olop manmâ bâleñe memai yâk hârok den kârikñeñe agak memeyenñe mem miawakyengim den âiân makmâ katyekmâ kotgâyenggiwiap. ¹³Aregât keñe hin. Anutugât den kârikñe yân ondop yeñân nângâwai yâk âmâ Anutuñe yekto ârândân bo akmap. Gârâmâ nângâm lokomai yâk âmâ ye ârândân dâm makyenggiwiap. ¹⁴Akto Yuda luâk âmbâle bo manmai yâk den kârikñe bâlâk manmai gârâmâ hanyenñe den kârikñe lokom âmâ den kârikñe bâlâk arekñe den kârikñe olop tirip hainare akmai. ¹⁵Hain akbiâ âmâ den kârikñe han biwiyenñe yoñâk talep aregât keñe miawakmap. Akto hanyenñe tuk tuk koyengim âmâ nângâ nângâyenñe purik gurik akmâ siân kotgâ akmap dâ siân makmâ mulunyekmap. ¹⁶Are amâ sop humoân âmâ Anutuñe Yesu Kristo agaño han nenñan siâ me siâ tiwân yendâp aregât keñe mem tektekñan miap katbiap. Aregât keñe amâ nâ den pat makyengiman a hainâk tektekñan miawakbiap. Hain.

Yuda luâk âmbâleñe Mosegât denñe bo lokoyi.

¹⁷Akto Yuda luâk gâ hin dâmat mon? Nâmâ Anutuñe menekmâ ikiñe den kârikñe are niñep gât nângâre humo aktâp dâmat aregât hin makñibe. ¹⁸Gâ Anutugât lau den nângâmat akto bikñande den kârikñe aregât keñe makñi aregât ire agakñe ire bo agakñe nângâm potatmat. ¹⁹Hain akmâ âmâ gugaet hin dâmat, “Nâ dewun yeñe bokbokñe manmai are âlepñe kewugu yekmâ dâwân kat yekman, akto hândâkñan manmai are âlepñe mem pagaleyekman, ²⁰akto luâk han kopañe are âlepñe manmâ miwindik yekman akto nanañ siâ me siâ âlepñe dâp hekat yengiman, akto den kârikñe aregât keñe amâ nângâ nângâ akto den bunñe aregât keñe tatmap dâmat mon?” ²¹Gâ hain makmat aregât luâk âmbâle bikñe makyengim âmâ guge biwige bo magañmat. Gâ kâmbu bo mem dâm makyengimat guge kâmbu akmat mon? ²²Luâkdâ âmbendâ bo hepun akñet dâm makyengim benñe gâ âmbenge hepunmat mon?

Gâ lâpio sârekomatŋe lâpio opmânjaet siâ me siâ kâmbu memmat mon?
 23 Gâ Anutugât den kârikŋe nânġâman dâmat amâ bo lokomat aregât bikŋande gekmâ Anutugât den nânġâmbiâ gemap. 24 Aregât Anutugât den kulemgoyi bikŋe hin tatâp, “Ye Yuda luâk âmbâleŋe bâleŋe akbiâ aregât Yuda luâk âmbâle bo manmai arekŋe yekmâ Anutugât kotŋe makmâ sârek kombiâ gemap.”

25 Gâ hâkgân Yudagât tirip tatġiŋdâp are den kârikŋe lokomenâ bunŋe aktâp. Dâ den kârikŋe loŋgaimbiâ âmâ hâkge gâiyi are yânŋe akbiap. 26 Gârâmâ aregât Yuda tirip bâlâk manmai arekŋe Anutugât den lokom âmâ tiripdâ hainare akbai. 27 Hain akmâ tirip bâlâk manmapŋe den kârikŋe lokomap yâkŋe âmâ keige gagaiwiap. Gagaim âmâ gâ Anutugât den kârikŋe nânġâmat akto Yudagât tirip olop manmat gâ den kârikŋe loŋgaimat aregât hâkge tunmâ keige gagaiwiap. 28 Aregât lâuwâŋe makbe. Luâk siâ yân hâkŋe Yuda luâk tirip akbiap amâ hâkŋeak manbiap. Hain arekŋe Yuda luâk bunŋe bo akbiap. 29 Amâ hanŋe Yuda luâk arekŋe bunŋe akbiap. Amâ Yuda luâk arekŋe hanŋân tirip bunŋe akmap yâkgât amâ Yuda luâk bunŋe dâmaen. Dâ hâkŋân den kârikŋegât tirip areâk mem manmap are bunŋe bo. Gârâmâ han biwiŋân tirip mem manmap arekŋe amâ Yuda luâk bunŋe dâmaen. Yâk hain aregât heroŋe amâ luâkgât bo. Anutuŋe nânġâambo âlepŋe akbiapgât.

Agak meme bâleŋande Anutugât den bo kombiap.

3 1 Akto yu kulemgoân are oyaŋmâ âmâ Yuda luâk âmbâleŋe âmâ Yuda gâtŋe bo are bo ewangiyekbaen dâi mon? Me Yuda tirip are yânŋe aktâp dâi mon? 2 Hain bo dâwei. Yuda luâk âmâ siâ me siâ biwirâ yeyenġiep. Yâk âmâ Anutuŋe den pat keiŋe keiŋe makyenġimbo aregât amboŋe agi. 3 Gârâmâ Yuda luâk âmbâle bikŋande Anutu hanyenande bo nânġanġbiâ aregât hin dâwaen mon? Bo nânġanġbiâ aregât Anutuŋe makto den kârikŋe tatmâ gaep are mem bâliâi hain dâwaen mon? 4 Are bo dondâŋe. Anutuŋe makto siâŋe hin kulemgoep,

Anutu, gâ makmenâ âmâ denge bunŋe ârândânġâk akbiâp, are nânġâenŋe huraguwiap. Akto gâ makmâ kotgâ akmâ potatmenâ âmâ siâŋe denge bo mendo gewiâp. Den are bunŋe akto luâk âmbâle hârokŋe hianġimai akto Anutuŋe konok âmâ bundâk makmap keiŋe are miawaktâp.

5 Are oyaŋmâ gain dâwaen? Bâleŋe nenŋande Anutu ârândânġ manmanjaet keiŋe mem miap panmapgât bâleŋe aktenŋe Anutuŋe aregât hâuŋe nengimbo ârândânġ bo akbiap dâwaen mon? Den are amâ luâk nânġâ nânġâgât dowân maktân. 6 Hain bo dondâ. Anutuŋe bâleŋe nenjaet hâuŋe bo nengimap dâine gain gain akmâ luâk âmbâle hârok nengât agak memenenŋe bâleŋe are mem kepilâwâi? 7 Aregât siâŋe hin dâwiap mon? Hianġi dennande Anutugât den bunŋe tângombo

kotŋe patŋe are humo akmâ sambelewiap, aregât wangât Anutuŋe nâ bâleŋe agângât hâuŋe niŋmap? Amâ bo ârândân akmap. ⁸Akto bâleŋân mandenŋe purik âgâm bunŋe âlepŋe miawakbiap mon? Nen âmâ hain bo dâmaen gârâmâ luâk bikŋande âmâ Paulomaŋe hain dâmai dâyi. Aregât hâuŋe miawakyenŋimbo ârândân akbiap. ⁹Aregât gain gain nânŋâm henŋemgowaen? Yuda luâkŋe luâk bikŋe ewangiyekmaen mon? Bo dondâ. Emelâk maktân. Yuda luâk akto Yuda luâk bo nen hârok bâleŋaet hoŋ manmaen. ¹⁰Aregât Anutugât den hin tatâp,

“Luâk âmbâle siâ ârândân siâ bo mandâp. Bo dondâŋe. ¹¹Hârokŋe agak meme âlepŋaet keiŋe bo nânŋâmai. Akto hârokŋe Anutu konmâ kulâgâtâmâ bo akmai. ¹²Luâk hârokŋe Anutu hamianmâ bâleŋe akmâ hâkŋe hâkŋe agi. Siâŋe siâ me siâ âlepŋe bo akmap. Bo dondâŋe. ¹³Hanyeŋe are momoŋe yenŋât dop. Elewetyeŋe purik dâmbo hianŋi den gamap. Biwityeŋande âmâ hâme hewukgât kundat bâleŋe mem miawâk panmap. ¹⁴Lauyeŋân âmâ sait akto gasagât den pikmâ lugum lokom yemap. ¹⁵Luâk yenŋuenŋe moŋet dâm aregât keiyeŋande owâiŋeâk tâlimai. ¹⁶Akto itiŋ gulam meyekmâ welam yeŋeâk mem miap panmai. ¹⁷Akto han biwi konok manbiâ biwiyeŋe sândugewiapgât pat bo nânŋâmai. ¹⁸Akto Anutu bo nânŋaŋmâ yâkgât hamep bo akmai.”

¹⁹Aregât keiŋe hin. Den kârikŋe arekŋe den kârikŋe nânŋâmaen nen damun nenŋe akmap. Arekŋeak keinenŋe gagaim, lau nenŋe gisapkomap. Akto luâk hârok dosanenŋe Anutugâlân miawakmâ metemap. ²⁰Aregât den kârikŋe lokone dâm âi humo mendenŋe Anutuŋe nenekto bo ârândân akmap. Hain gârâmâ benŋe den kârikŋe arekŋe dosa nenŋe mem miap panmap. Hain.

Anutuŋe nenekto ârândân akmapgât den.

²¹Dâ hinŋe âmâ Anutuŋe nenekmâ dosayeŋe bo dâwiapgât dâp miawagân miawaktâp. I are âmâ den kârikŋe lokowaengât dop bo. Gârâmâ den kârikŋe akto propeteŋe kulemgoyi den arekŋe makmâ miawagep. ²²Anutuŋe nenekto ârândân akbiapgât dâp amâ nen Yesu Kristo nânŋaŋmaen nengât hârok. Siâŋe me siâŋe Yesu Kristo nânŋaŋdo ainâk ârândânŋgât dâp miawagaŋmap. ²³Akto emelâk nen hârokŋe bâleŋe akmâ dosagât pat agion, aregât Anutugât egâlianŋ pagalenŋân ariwaengât dop bo tatnengiep. ²⁴Aregât hainâk nen hârok Yesu Kristoŋe bâleŋe nenŋe miepgât Anutuŋe han kalemŋaet akmâ dosa bâlâk dâm menenekmap. ²⁵Anutuŋe dâmbo Yesuŋe bâleŋe nenŋaet akmâ sumbe kato Anutuŋe kuk agaŋdo bo agep. Aregât nenŋe nânŋaŋbaenŋe sumbe are mendenŋe dosa nenŋe bo agep. Anutuŋe hain agepgât ikiŋe agak meme ârândân are miapŋân miawagep. Akto ulikŋân bâleŋe akmâ

gayiongât dosa aregât hâuŋe dowâk bo nengiep, a hainâk nâŋgâyion. ²⁶Anutuŋe hain akmap âmâ ârândâŋ amboŋe manmap dâm nâŋgâyion. Dâ Yesu hannenŋande nâŋganŋdenŋe dosayeŋe bo tatyenŋiâp dâwiapgât keiŋe hinŋeâk tek tegiâkgât hain are agep.

²⁷Aregât nen nenŋaet akmâ nâŋgâenŋe humo akbiapgât dop yendâp mon? Bo. Hâk nâŋgâ nâŋgânenŋe are nâŋgâenŋe bâliâp. Are amâ den kârikŋe lokoyiongât bo miawaktâp, amâ Yesu nâŋganŋdenŋe hâknenŋe akto nâŋgâ nâŋgânenŋe yânŋe aktâp. ²⁸Aregât den hin nâŋgâenŋe yemiâp. Den kârikŋe lokoenŋe dosayeŋe bo dâwiapgât dop bo tatâp. Yesu nâŋganŋmâ kepilâenŋe âmâ dosanenŋe bo dâwiâp. ²⁹Dâ Anutu Yuda luâk nengâlâgâk damun mon? Bo. Yâk amâ Yuda gâtŋe bo yâk yengât damun gai. ³⁰Anutunenŋe konok yâkŋe nen Yudagât tirip mem manmaen me tirip bâlâk manmai nen hârokŋe Yesu nâŋganŋdenŋe dosayeŋe bo dâm menenekmap. ³¹Aregât Yesu nâŋganŋmâ âmâ den kârikŋe nâŋgâenŋe giep mon? Bo dondâŋe. Nenŋe Yesu nâŋganŋmâ âmâ den kârikŋe tângomaen.

Anutuŋe Abrahamgât luâk âlepŋe dâep.

4 ¹Akto Yuda nengât hakunenŋe Abraham âmâ wan peniaŋep? dâwaen. ²Abrahamŋe Anutugât den kârikŋe lokombo Anutuŋe ekmâ dosage bo tatŋindâp dâep dâine benŋe Abrahamŋe ikinŋaet nâŋgâmbô humo akbop. Amâ Anutugât metenân âmâ bo. ³Akto Anutugât denân hin yendâp aregâten, “Abrahamŋe Anutu nâŋganŋdo aregât dosage bo dâm makmâ miawaganŋep.”

⁴Dâ luâk siâŋe âi mendo âmâ benŋe hâuŋe waŋmaen are amâ han kalem nenŋaet pat bo. Amâ hâu kutigit aŋmaen. ⁵Dâ luâk siâŋe âi bo mem âmâ Anutuŋe bâleŋe meme nengât dosa hepunmap yâk nâŋganŋbiap âmâ ainâk Anutuŋe luâk aregât nâŋgâm kepilâ kepilâŋaet akmâ nâŋgâm âmâ dosa bo tatŋindâp dâm maganŋbiap. ⁶Aregât keiŋe Dawidiŋe hainâgâk nâŋgâm âmâ luâk siâ âmâ âi bo mendo Anutuŋe gâunaŋmâ dosage bo dâwiapgât yâkgât heronŋe maronŋegât keiŋe hin kulemgœp.

⁷“Dosa umatŋe mem manmai yâk Anutuŋe dosayeŋe bo tatyenŋiâp dâwiapgât are nâŋgâmbiâ ukenŋe akbiap. ⁸Akto luâk siâŋe bâleŋe akmâ gaep yâk Humonŋe nâŋganŋdo dosage olop bo aktât dâm maganŋbiap yâk nâŋgâmbô amâ ukenŋe humo akbiap.”

⁹Akto ukenŋe humo are âmâ Yuda tirip olop nengâlâk pat aktâp mon? Me tirip bâlâk yâk yengât olop aktâp? Aregât Abrahamgât pat nâŋgâenŋe keiŋe miawakberâp. Hin. Abrahamŋe Anutu nâŋganŋdo Anutuŋe ekto ârândâŋ agep. Hain nâŋgâmaen. ¹⁰Akto wan sowân dosage bo dâm maganŋep? Tirip olop malewân me tirip bâlâk malewân? Tirip olop malewân ain bo maganŋep. Ulikŋân Abraham tirip bâlâk mandoân Anutuŋe dosage hepunanŋep. ¹¹Yâk tirip bâlâk malewân Anutu nâŋganŋdo dosage hepunanŋep aregât tirip kulem beirâ waŋep. Anutuŋe

hain aganepgât benje Abrahamne hinje tirip bâlâk manmaine Anutu nânğanmaigât dosa bâlâk hinare akmai yâk yengât Eweyene uliknân meme agep. ¹² Abraham hain agepgât âmâ nen tirip olop manmaen nengât Ewenenje agep. Dâ tirip hâknennân miawagep aregât bo. Abrahamne hâknân tirip bo talewân âmâ Anutu nânğanminep, dâp areâk watmâ Anutu nânğanmaen âmâ benje Anutu amâ Humonenje dâenne ârândân akbiap.

¹³ Anutuje Abrahamgât bâgilupje hân hârok yengiwian dâm hângât pat katyengiep amâ den kârikje loko lokogât akmâ bo. Abrahamne Anutu nânğanmâ kepilâmbô âmâ Anutuje nânğambo ârândân agepgât Anutuje hângât magep. ¹⁴ Amâ hingât. Anutuje makmâ hâriep aregât pat amâ den kârikje lokomai yâk yengât makmâ hâriep dâine benje Anutu nânğanmaen are amâ yânje akbop. Akto Anutuje makmâ hâriep akai yânje akbop. ¹⁵ Aregât keije hin. Den kârikje arekne amâ dosagât hâuje kaknennân katmap. Dâ den kârikje bâlâgân âmâ den koko are bo miawakmap. ¹⁶ Are gârâmâ Anutu nânğanmâ kepilâmaen are nengât miawagep. Amâ wangât? Hingât. Anutuje ukenjaet akmâ han kalem akmâ makmâ hârembo Abrahamgât kâmolân hârok yâk yengâlân miawagep. Dâ den kârikje lokomai gâlâk bo. Abraham amâ nengât hakunenje dâmaengât Abrahamne Anutu nânğanndo bunje agep amâ nen Anutu nânğanndenje bunje akmap aregât akmâ nengâlân miawagep. ¹⁷ Aregât keije Anutuje makto kulemgoep hin tatâp. “Nâje luâk kâmotje kâmotje yâk yengât Eweyene akbiat dâm makmâ hâregindân.” dâep. Abrahamne Anutu nânğanmâ hin nânğâm kârigiep, “Anutu amâ momone mem golâ katyekmap. Akto siâ me siâ bo yendâp are dâmbô miawakmai.” hain nânğâep.

Abrahamne Anutu nânğâm kepilâ anep.

¹⁸ Akto Anutuje, “Gânğât kâlelupje biwirâ miawakbai” dâm maganep, den are nânğambo humo agep. Akto den are biwinân mem kârikje mângim malepgât hânje hânje yâkgât bâgilupje miawakbaigât nânğâep. ¹⁹ Hain akmâ âmâ hombanje 100 malepgât ikiye hâkne serokne akto Saragât hâkne gai hainâgâk agep are ekmâ nânğambo umatje bo agep. Akto Anutuje magep are nânğâm âmâ bo hanoko agep. ²⁰ Akto Anutuje pat âlepgât magep are nânğâm âmâ han biwine bo hogo agep. Amâ bunjerâm malep. Hain akmâ nânğanmâ kârigem Anutugât nânğambo âgâ ando ikiye biwi kat katgât kârikje akmâ âgâep. ²¹ Amâ Anutuje siâ me siâ makmâ hâriep are bunje agâk dâmbô âlepje miawakbiap nânğâep. ²² Hain nânğâepgât akto Anutu nânğanndo bunje agepgât Anutuje yâkgât nânğâm âmâ “Dosage bo tatgindâp.” dâm makto miawaganep. ²³ Akto Anutuje dosage bo tatgindâp den are Abraham gâlâk bo magep. ²⁴ Nengât gai aktâp. Kembunenje Yesu Kristo momonân

ba mem agalep Anutu yâk nânğanmaen nengât gai magep. Akto nengât akmâ miawaknengiwiap. ²⁵Are âmâ Anutuņe makto Yesu dosa nenņaet akmâ moep. Mondo dosa bâlâk manbaengât âmâ Anutuņe momoņanba mem agalep.

**Anutuņe nengât dosanenņe bo agep aregât
biwinenņe mem sândugemap.**

5 ¹Aregât nen Yesu nânğanjiongât Anutuņe nenekto dosa nenņe bo agep. Aregât Anutuņe Humonenņe Yesu Kristogât akmâ nânğambo kuk bo akto biwinenņe sândugemap. ²Yesuņeak hânġi menengiepgât Anutuņe han kalem akmâ damunnenņe akto yeukņân manmaen, akmâ maleine Anutugât kulem pagaleņe miawaknengimbo ekmâ egâlijanbaen. ³Akto areâk bo. Umatņe miawaknengimbo arekņe amâ han biwinenņe kârikņe ketugunengimap aregât bo hâkân akmaen. Aregât umatņe miawaknengimboân âmâ heroņe akmaen. ⁴Akto hâk hilâlâm nânğâm bo hâkân aktenņe âmâ wât kârikņe miawaknengimap. Akto wât kârikņande âmâ himbingât egâlijanbaengât mem miawaknengimap. ⁵Himbingât egâlijanġât olop manbaen arekņe amâ bo pâpkom anun anmaen. Amâ hingât. Anutuņe ikiņe ukenņaet akmâ Heak owâiņeâk nengimapġât Anutugât han kalem are biwinenņân lugum totokombo gem tatmapġât bo pâpkomaen.

⁶Akto Yesu bo nânğanjion sop ain tân agu agugât dâp bo tatnengiep, sop ain Kristoņe bâleņe meme nengât hâu mem moep. ⁷Aregât hin nânğâen. Luâk siâņe luâk siâ ârandânġâk manmap are tângowerâm mombiap hainare bo tatâp. Dâ luâk âlepņe han kalem akmâ manmap are tângowerâm mombiap hainare konok konok tatmai mon? ⁸Dâ Anutuņe nen bâleņe malionân ain han kalemņaet akmâ makto Kristoņe bâleņe nenņaet akmâ moep. Mondo ainâk Anutugât han kalemņe amâ miawakto egion.

⁹Akto ire Kristogât hepņaet akmâ dosa bâlâk agiongât Anutugât kuk sopņe miawakbiawân âlepņe tânnengumbo yâkgât akmâ kuk are bo miawaknengiwiap. ¹⁰Amâ hingât. Nen Anutu gasa aganjmâ mandenņe nanņe moepġât akmâ han kalem aknengiep amâ âi humo. Are hinņe Anutuņe han kalem aknengiewân amâ manmanņaet akmâ manman kârikņân katnenekbiapġât amâ âi owâiņe. ¹¹Akto areâk bo. Kembunenņe Yesu Kristoņe Anutu olop mendunenegepgât aregât yâkgât akmâ Anutu yâk makmâ egâlijan aganjmâ heroņe akmaen.

Adamņe bâleņe agepgât momogât dâp miawagep.

¹²Aregât hin nânğâne. Luâk Adam konokņe bâleņe agepgât bâleņe keiņe keiņe hânân miawagep. Hain akto bâleņaet momo miawaknengiep. Akto luâk hârok bâlim meteyiongât momogât patņe luâk hârok katip

nenguep. ¹³ Akto den kârikŋe bo miawaktoân bâleŋande ulikŋân miawakmâ yiep. Dâ den kârikŋe bo talep amâ yân yem gaep. ¹⁴ Gârâmâ momoŋe Adamgâlân keiŋe katmâ luâk manmâ gayi yâk damun yengum gam mando âmâ Mose miawagep. Amâ Adamŋe den koko agepgât hainare bo agi yâk yengâlân miawagep. Akto Adam amâ luâk siâ beirâ miawakbiapgât tirip akmâ malep.

¹⁵ Dâ han kalemŋe âmâ den kokogât dop bo aktâp. Luâk konokgât den kokoŋaet biwirâŋe mom hilip aguyi. Hain akto Anutugât han kalemŋe amâ luâk konok Yesu Kristo yâkgât âleŋaet akmâ Adamgât den koko ewangim luâk biwirâ nengâlân miawagep. ¹⁶ Aregât lâuwâŋe makbe. Luâk konok Adam yâkŋe bâleŋe agepgât nen hârok den âiân miawaktenŋe dosanenŋe miawakbiap. Dâ bâleŋe nenŋe humo aktoân âmâ Anutuŋe han kalem nengiep arekŋe nen dosanenŋe boân manbaengât mem miawaknengiep. Aregât Anutuŋe han kalem nengiep are akto luâk konokŋe bâleŋe akto miawaknengiep are amâ dop yetŋe konok bo. ¹⁷ Amâ Adam luâk konokŋe den koepgât momoŋe damunnenŋe akmâ gaep. Aregât Anutuŋe han kalemŋe yem âgâwiapgât akto dosa bâlâk manman are nengiwiap. Aregât amâ nenŋe luâk konok Yesu Kristo yâkgât akmâ manman kârikŋân kembu akmâ manbaen. ¹⁸ Aregât hin. Luâk konokŋe den kom malepgât luâk hârokŋe hememgât pat agion. Aregât luâk konokŋe ârândân mando dosa bâlâk manbaengât pat agion. ¹⁹ Luâk konokgât den kokogât Anutuŋe nenekmâ dosa luâk dâm nengonlep. Hainagâk luâk konokgât den loko lokogât amâ Anutuŋe nenekmâ dosa luâk bo dâm nengonlep.

²⁰ Akto den kârikŋe amâ bâleŋande sambeleâkgât tânâmŋân miawakto ekbaengât. Dâ bâleŋande sambelem miawakmâ âgâambo ainâk Anutugât han kalem arekŋe sambelem ewangim âgâep. ²¹ Dâ aregât luâk âmbâle agak meme bâleŋe akmâ manbiâ momo dondâ arekŋe meyekto gayi. Gârâmâ luâk âmbâle bikŋande Yesu Kristo Humonenŋe yâkgât akmâ nânŋaŋmâ manmaen nen Anutugât han kalemŋe damunnenŋe akmâ dosa bâlâk menenekmâ manman kârikŋân katnenekbiap. Are âmâ Kristo Kembunenŋe yâkgât akmâ miawakbiap.

Yesugâlân dewatiyion.

6 ¹ Aregât gain dâweren? Anutugât han kalemŋe miawakmâ sambelem ariwiapgât bâleŋe aktenŋe ârândân akbiap. Hain dâweren mon? ² Hain bo. Bâleŋaet akmâ moyion nenŋe gain gain gaetŋe bâleŋe lâuwâŋe akmâ manmaen? ³ Aregât ye hin bo nânŋâi mon? Nen tu pulinengiyiân âmâ Yesu Kristogâlân dewatiyion. Dewatim âmâ yâkgât momoân dewatiyion. ⁴ Hain akmâ dewatienŋe âmâ Kristo olop han nenguep. Hain akto Eweŋe Anutu yâkgât pagaleŋande Kristo mem agato momoŋânba agalep hain agâk nen golâ akmâ manman irakŋe ain manbaen.

⁵Aregât lâuwâne makbe. Anutuŋe nanŋe moep aregât pat nengiep. Hain nengim âmâ Yâkgâlân dewatinenegep. Aregât akmâ Yesuŋe momoŋânba agalep dop hainâk mem agatnenebiap. ⁶Aregât hin nâŋgâmaen. Han tâmbâne nenŋe Yesu olop lâwinân moep dop hainâk bâleŋenenŋe bo agâkgât miawagep. Hain miawakto bâleŋe nenŋande bo damunnenŋe akbiapgât dâp miawagep. ⁷Amâ hingât luâk siâ mondo âmâ bâleŋande lâuwâne bo damunŋe akbiap.

⁸Akto nen âmâ Kristo olop moyion aregât yâk momoŋânba agatmâ manmâ âgâwiapgât nen âkâ yâk olop manmâ âgâwaen. Hain nâŋgâmaen. ⁹Akto Kristogât hin nâŋgâmaen. Yâk momoŋân ba agalepgât lâuwâne bo mombiap. Akto momogât pat arekŋe lâuwâne bo damunŋe akbiap. Bo. ¹⁰Yâk moep amâ bâleŋaet sop konok mondo bo agep are. Akto hinŋe mandâp amâ Anutugât akmâ mandâp. ¹¹Aregât ye hainâgâk bâleŋeyeŋaet pat moyigât Yesu Kristo yâk olop Anutugât akmâ manmâ âgâniâm dâwei. ¹²Aregât bâleŋande hâkyeŋe damunŋe akbopgât nâŋgâmâk manbei. Akto hâkyeŋande egâlianŋ bâleŋaet hâwâtyekbopgât are gai nâŋgâmâk biwiyeŋe damunŋe akmâ manbei. ¹³Hain akmâ hâkyeŋande bâleŋaet pat hoŋ bawa bo aganŋbiapgât hin akbei. Anutuŋe momoŋânba oloŋ yekmâ manman âlepŋân katyegepgât hâk biwiyeŋe Anutugât kotgâm waŋbiâ âlepŋaet hoŋ manbiâp. ¹⁴Amâ hingât. Ye den kârikŋande bo damunyeŋe akmâ denân katyekmap. Bo. Anutugât han kalemŋande damunyeŋe akmapgât bâleŋande luâk kembu bo akyeŋgiwiâp.

Agak meme âlepŋe aregât hoŋ bawa aganŋmaen.

¹⁵Aregât ire gain akbaen? Anutugât han kalemân manmâ arienŋe den kârikŋaet horat hulaŋ agepgât bâleŋe mendenŋe ârândânŋ akbiap mon? Amâ bo. ¹⁶Luâk kembu siâ han biwiyeŋande hikom kinmâ lau lokoanŋbaŋe yâkgât hoŋ aganŋmâ âi meanŋbai. Bâleŋande damunyeŋe akto aregât hoŋ mananŋmâ ageine mom hilip aguwâi me lau loko lokoŋe damunyeŋe akto yâkgât hoŋ manmâ âgâmbiâ Anutuŋe yekto huraguwiâp. Are nâŋgâi mon? ¹⁷Ye bâleŋaet hoŋ manmâ gayi are bo agep. Dâ luâk bikŋande Yesugât keiŋe makyeŋgimbiâ âmâ pânŋan mem han yeŋande nâŋgâm kepilâm lokomai aregât Anutu mepaiŋe meanŋbaen. ¹⁸Dosa yeŋande wârakmâ mem ge katyekto aregât hoŋ bawa akmâ mali are Anutuŋe kom mem oloŋyekmâ agak meme âlepŋân katyekto aregât hoŋ bawa aganŋi.

¹⁹Han tâmbâne yeŋe yeukŋe aregât luâgân siâ me siâ yendâp aregât dop katmâ makyeŋgiân. Ye ulikŋân hâk biwiyeŋe egâlianŋ bâleŋe aregât hoŋ aganŋbiâ humo akto gulip mali. Aregât sop uŋak âmâ hâk biwiyeŋe ârândânŋgât hoŋ bawa aganŋbiâ humo akto han ârândânŋâk akmâ manbei. ²⁰Ulikŋân bâleŋaet hoŋ maliân ain ârândânŋ manmangât horat are bo yeyeŋgiep. ²¹Akto sop ain wan bunŋe miawakyeŋgiep? Bo. Aregât

kakjân momo miawak yengwiapgât pat. Dâ hinje are nângâm âmâ aņunje olowâk mandâi. ²²Bâin. Sop hinje amâ bâleņæet tâk hulaņdo Anutugât hoņ manman agi mandâi. Hain akbiâ han irakje akto agak meme ârândâņ miawak yengjep. Dâ beirâ âmâ manman kârikje mem manbai. ²³Bâleņæet hâunje âmâ momo membaen. Dâ Anutuņe han kaleņæet akmâ Kembu nenje Yesu Kristo yâkgât akmâ manman kârikje nengimbo mem manmaen.

Yesu moepgât den kârikjæet tâk hâreņep.

7 ¹Galama, den kârikjæet keije nângâmai ye hin makyenjiwe. Ye hin bo nângâmai mon? Nen mandenje den kârikje arekje damun nenje akmap. Dâ mombaenân âmâ den kârikje arekje bo damun nenje akbiap. ²Aregât âmbâle siâņe luâk siâ mendoân den kârikje hin kalaņep, luâk hepunbiapgât dop bo yendâp. Dâ luâkje mondo den kârikje makmâ hâreņep are hepunbiapgât dâp talaņbiap. ³Aregât luâkje golâ mandoân ain âmâ hepunmâ luâk siâ mendo âmâ âmbâle bâleņe dâm konmaen. Dâ luâkje mondo âmâ luâkdâ âmbendâ menduyelegep tâk are hâreņep. Aregât luâk siâ membiawân ain mem hepun hepunġât dosa bo membiap.

⁴Galama yengât keijeņe hainâk yendâp. Kristogât hâkje mondo ain den kârikje aregât tâk hârieņ. Hârembo den kârikjæet moyi. Are amâ ambo siâgât agi. Anutuņe nanje momoņânba agalep mandâp yâkgât kâmot agi. Aregât nen Anutu bunje peniaņiongât. ⁵Dâ ulikjân manman tâmbâņe malion sop ain den kârikje arekje egâliāņ bâleņe kâlâņe waito hâk biwinenņân âiņe mem malep. Hain aknengimbo momogât bunje mem peniaņion. ⁶Dâ hinje amâ den kârikje arekje bo damun nenje akmap aregât tâkje hulaņ nengiewân amâ den kulemgât dâp tâmbâņe bo watmâ âmâ Heakgât dâp irakje tâlim arimaen.

Bâleņande hilip nengumap.

⁷Aregât gain dâweren? Den kârikje ire amâ bâleņe mon? Hain bo. Den kârikje bo tatâp dâine nâ bâleņæet keije bo nângâm kotgâwom. Den kârikje arekje hin makmâ miawakniņdâp, “Egâliāņ bâleņe bo nângâm egâliāņben.” den are bo tatâp dâine egâliāņ bâleņe bo nângâwom. ⁸Gârâmâ bâleņe are âmâ den kârikje arekje tân agaņdo hanne hâwâto egâliāņ bâleņe keije keije miawakniņep. Amâ den kârikje arekje bo yendâp dâine bâleņande yân limbâp agum yembop. ⁹Nâ ulikjân den kârikjæet dâwân bo malân ain âmâ manmanne miawaknengjep. Aregât hamiņân den kârikje arekje penâniņdo bâleņande biwinân âi mendo momogât dâwân ariân. ¹⁰Den kârikje arekje manmangât dâp makmâ miawakmap arekje purik dâm momogât dâp miawakniņep. ¹¹Amâ hingât. Bâleņe are âmâ den kârikje arekje tângombo kârikje akmâ heniņmâ nugumbo momo hinare agân. ¹²Aregât hin nângân. Den kârikje

amâ dosa bâlâk. Akto Anutuŋe wan me wan makmâ hâriep den are hainâk amâ dosa bâlâk akto Anutuŋe nânġâmbo âlepŋe akto ârândân akmap. ¹³Aregât hin dâwe mon? Den kârikŋe amâ âlepŋe arekŋe konok nâ nugumbo momogât dâp miawakniŋep mon? Hain bo. Bâleŋenande den kârikŋe âlepŋe aregât akmâ momoŋe nuguep. Amâ hingât. Anutuŋe wan makmâ hâriep den aregât akmâ bâleŋenaet keiŋe nânġâm heŋgemgore bâleŋaet hândâkŋe dondâ bâleŋe miawakmâ kinbiapġât.

Bâleŋande hikom katnenekmap.

¹⁴Dâ nenâmâ hin nânġâmaen. Den kârikŋe amâ Heakġât pat. Dâ nâmâ bâleŋaet hoŋ agaŋmâ hânġât pat manman. ¹⁵Nâ agak memene nânġâwerâm aktere purik gurik agep. Amâ hin. Nâ siâ me siâ akberâre umatŋe akto bo akman. Dâ siâ me siâ sârekoman are amâ akman. ¹⁶Akto wan me wan sârikoman are akman âmâ benŋe hin nânġân, den kârikŋe are nânġâre âlepŋe akmap dâman. ¹⁷Aregât wan akmâ bâlیمان are amâ nâ nune hangât bo akman. Bâleŋande hanân yem hâwâtnekto akman aregât. ¹⁸Nâ keine hin nânġân. Agak meme âlepŋaet egâlianŋman are amâ membiangât dâp bo tatniġdâp, aregât hâknân wan me wan siâ âlepŋe bo yendâp. Hain nânġân. ¹⁹Amâ hin. Nâ wan me wan siâ âlepŋe akbian dâm kinmâ âmâ bo akman. Dâ siâ me siâ bâleŋe bo akbian dâm kinmâ âmâ akman. ²⁰Bâleŋe bo akbian dâm makmâ hanâk akman amâ nunak bo. Bâleŋe biwinân tatmap arekŋe huŋgunniġdo hanâk akman, hain nânġân. ²¹Aregât nânġâlân hin miawakmap. Siâ me siâ âlepŋe akberâre âmâ bâleŋande mete katniŋmap. ²²Nâ han biwinande Anutuŋe den kârikŋe kalep are nânġâre ârândân akto heroŋe akman. ²³Dâ hâknande âmâ nânġâ nânġâne are kondo gembo bâleŋe hâknân manmap arekŋe hiko nekto umatŋân mandân. ²⁴Aregât mesak gosak akman. Gâuk niŋande hâkne momogât pat agakŋe mem kotdâ nekbiap? Amâ hin. ²⁵Nâmâ Yesu Kristo Humo nenŋe yâġġât akmâ Anutu mepaiŋe meman. Bâin. Nâ Anutuġât den kârikŋe are nânġâre ârândân akto nânġâ nânġânande hoŋ agaŋman. Dâ hâknande âmâ bâleŋaet kârikŋe hoŋ agaŋman.

Yesuŋe dosanenŋe puliepgât yâk nânġâm kepilâ aŋbaen.

8 ¹Aregât Yesu Kristo olop manmaen nen âmâ Anutuŋe bâleŋaet hâuŋe bo makmâ kotdâ nengiwiap. ²Amâ hingât Anutuġât Heak arekŋe Yesu Kristogât manman are nengiep pat arekŋe bâleŋaet tâk akto momogât tâk hâriep. ³Akto den kârikŋe are han tâmbâŋe nenŋande kârikŋeŋe kondo gembo nengâlân âi mem âsinenekto bo agep. Aregât Anutuŋe nanŋe luâk hainare ak dâmbo luâk akmâ gem mando bâleŋaet akmâ nanŋe kuk agaŋdo moep. ⁴Mondo âmâ den kârikŋe loko loko âlepŋe miawaknengiep. Nen han tâmbâŋaet dâp bo watmaen. Bo. Amâ Heakġât dâp tâlimaen nengâlân den kârikŋe loko loko âlepŋe mendenŋe

huraguwiapgât dâp miawaknengiep. ⁵Hâkyeŋaet dâp tâlimai yâkŋe âmâ hâkgât nângâmbiâ humo akmap. Dâ Heakgât dâp tâlimaen nenŋe âmâ Heakgât siâ me siâ aregâlâk nângâenŋe humo akmap. ⁶Hâkgâlâk nângâm manbiâ âmâ momo miawakyeŋgimbo hilip aguwai. Dâ Heakgât nângâenŋe humo akbiap amâ manman âlepŋe akto biwi sânduk membaen. ⁷Amâ hingât. Luâk siâŋe hângâlâk nângâmbo humo akmap yâkgât nângâ nângânande Anutu gasa aganŋap. Nângâ nângânande Anutugât den kârikŋaet amukŋân tatbiapgât dop bo tatâpgât den kârikŋe are hâkâŋe akmâ panmap. ⁸Amâ wangât? Hingât. Hâkgâlâk nângâmâi yâk Anutuŋe yekmâ hâkânŋ akmap.

⁹Dâ ye Romagâtŋe amâ Anutugât Heakŋe arekŋe hanyenân tatmâ manmapgât hâkgât patŋande bo damun yeŋe akmap. Amâ Heak olop menduguakmâ manmaigât. Dâ siâŋe Kristogât Heak bâlâk manbiapŋe yâkgât pat bo mem manbiap. ¹⁰Dâ Kristoŋe hanyenân manmawân hâkyeŋande bâleŋaet akmâ momoŋe akyeŋgimap gârâmâ han otne yeŋande amâ dosa bâlâkgât golâ akmâ manmap. ¹¹Akto Yesu momoŋânba mem agalep Anutugât Heakŋe hanyenân tatmap arekŋe Kristo Yesu momoŋânba mem agalep dop hainâk hanyenân Heakŋe mandâp yâkgât akmâ hâkyeŋe momoŋe are hainagâk mem golâ katbiap.

Heakŋe menenekto yâkgât agion.

¹²Galalupne, nengât hâu yendâp aregât hâknenŋaet bo nângâmâk manbaen. Akto hâkgât agak meme bo mem manbaen. ¹³Amâ ye hâkgât agak meme watmâ manbai âmâ hilip aguwai. Dâ Heakgât kârikŋân agak meme are kombiâ gembo âmâ manman âlepŋân manmâ âgâwai. ¹⁴Aregât keiŋe hin. Anutugât Heak arekŋe sokoyekto manmai yâk âmâ Anutuŋe nan barat dâm yeŋonmap. ¹⁵Anutugât Heak yeŋgiep are âmâ hoŋ manmanlupŋe manmâ hamep akŋetgât bo. Nan barat bunŋe manŋetgât Heak yeŋgiep. Aregât akmâ Ewenenŋe âlepŋe dâm konmaen. ¹⁶Amâ nen Anutugât nan barat manden den are âmâ Heakŋe biwinenŋân makmâ humolembo nângâmaen. ¹⁷Nanŋe baratŋe mandengât Anutuŋe bâtŋe bâiŋe nengiwiapgât dop miawaknengiep gât Kristo olop mendugum damun akbaen. Amâ in hânân yâk olop dâtŋe metŋe kakŋân manbaen âmâ âlepŋe yâk olop egâlianŋe pagaleŋe âlepŋân nen hârogâk manbaen.

Manman âlepŋe aregât lâmgom manmaen.

¹⁸Galalupne. Nâ hin nângân. Himbimân Anutuŋe egâlianŋe âlepŋe nengiwiap arekŋe hânân hâk hilâlâm umburuk yendâp are ewangiâp aregât hâk hilâlâmŋe nângâenŋe yânŋe akbiâp. ¹⁹Anutugât nan barat manmaen nen pagaleŋe miawaknengimbo tektekŋân manbaengât siâ me siâ liulep arekŋe aregât imbianŋe lâmgom manmai. ²⁰Amâ hingât. Anutuŋe siâ me siâ liulep are mom bâle bâlegât kâlegen katyegep. Are

amâ yengât hangât bo. Anutuŋe siân wan âlepŋe miawakbiap aregât lâmgom manbaigât lope kâlegen katyegep. ²¹ Amâ hingât. Beirâ wan me wan liulep are gai mom hilipaguwaigât tâkŋe guŋmâ panmâ kârikŋe akmâ Anutugât nanŋe baratŋe nengâlân egâliŋ âlepŋân dewatinenekbai. Haingât.

²² Nen aregât hin nâŋgâmaen. Anutuŋe kotŋe siâ siâ hârok ketuguep are hârokŋe âmbâleŋe nanaŋ memberâm hâk hilâlâm nâŋgâm kamboŋmai dop hainâk akmâ lâmgom manmâ kamboŋmai. ²³ Akto wan me wan liulep areâk bo akmap. Nenâkai, Heakŋe biwinnenŋe bunŋe aknengimap Anutugât nan barat manden aregât keiŋe miawaknengiâkgât akto Anutuŋe hâk nenŋe mem hulaŋmâ heŋgemgom mem tek tekŋân katnenekbiapgât sopŋe lâmgom manmâ han nenŋande mesak gosak akmâ umburukŋe akmaen. ²⁴ Hain akmâ lâmgom manmaengât amâ Anutuŋe heŋgem nenguwiapgât pat miawak nengiep. Dâ siâŋe siâ lâmgom manbiapŋe âmâ wan me wan ekbiawân lâuwâŋe bo lâmgom âmâ biwi owâi bo akmap. ²⁵ Gârâmâ nenâmâ hinŋe wan bo ekmaen are lâmgomaen âmâ biwinnenŋe owâiŋe akto bo hâkâŋ akmaen.

Heakŋe tânnengumap.

²⁶ Akto dop hainâk Heakŋe gai nen yeukŋaet akmâ tân nengumap. Nen hin me hain ulilaŋdenŋe ârândân akbiap are âmâ bonâŋgâm kotgâmaengât Heakŋe han nenŋe mem owâimbo den luâkŋe bo nâŋgâmaenŋe are maktenŋe miawakto Anutuŋe nâŋgâmap. ²⁷ Akto Anutu biwinnenŋân ekmapŋe âmâ Heakgât den nâŋgâmap. Amâ Heakŋe nen Anutugât kâmot nengât akmâ Anutuŋe wan me wan makmâ hâriep are nâŋgâmap areâkgât ulilaŋmap. ²⁸ Akto areâk bo. Nen hin nâŋgâmaen. Anutu han nenŋande nâŋgaŋmaen nengât akmâ wan me wan miawaknengimap are hârok mem tân nenguwiapgât mâŋginenekmap. Amâ yâkŋe han kalemŋaet akmâ oloŋ nenegep nengât. ²⁹ Ulikŋân Anutuŋe han kalemŋaet akmâ potatnenegep gât Nanŋaet tirip akbaengât makmâ hâriep. Akto emiŋe gariŋe biwirâ aktenŋe ikiŋe âmâ teunenŋe humo ulikŋân gâtŋe akmâ manbiapgât makmâ hâriep. ³⁰ Anutu luâk âmbâle ulikŋân nâŋgâm heŋgemgom potat nenegepgât nengonmâ oloŋnenegep. Nengonmâ oloŋ nenegepgât dosa nenŋe bo aktâp dâep. Dosa nenŋe bo aktâp dâep gât egâliŋ âlepŋe nengiep.

Anutugât han kalemânba siâ me siâŋe bo hilipnenguwiap.

³¹ Den are keiŋe gain gain yendâp dâweren? Anutuŋe gala bo aknengimap dâine gasalupnenŋande dondâ yeukŋe aknengimbiâ hilip aguwâen. ³² Anutuŋe ikiŋe Nanŋe bo gangerâm dumnenŋân kilâkgât huŋgun aŋdo giep are amâ âi humo. Dâ wan me wan yâkgât akmâ nengiwiap amâ owâiŋe. ³³ Anutuŋe ikiŋak dosa nenŋe bo aktâp dâmap

aregât yâkgât kâmotlupņe nen niņande denân katnenekbop? ³⁴ Akto Kristo Yesu ikinak moep. Akmâ moewâk bo. Yâk momoņânba agatmâ Anutugât bātņe bungen âgâ talepgât nengât akmâ Anutu ulilaņmap, aregât niņande denân katnenekto dosa nenņe miawakbiap? ³⁵ Akto Kristogât han kalemânba wan arekņæetņe oloņ nenekto yân manbaen? Amâ hâk hilâlâmņe me dâtņe metņande me gasalupnenņande me mop manmanņe me hanokoak manmanņe me tembe bugâņe arekņe? Are hârokņe Kristogât han kalemânba oloņnenekbiapgât dop bo. ³⁶ Amâ Anutuņe aregât magep hin tatâp,

“Anutu gâņgât akmâ hâk hilâlâm nâņgâenņe hokboâk hokboâk gasalupnenņande itiņ gulam menenekmai. Akto bau kom gâimaen aregât dop hainâk akngimai.”

³⁷ Hain arekņe bo mem ge katnenekbiap. Bo. Yesuņe han kalem akmapgât kârigeņ kârikņe humo peniaņmâ kinmaen. ³⁸ Aregât hin nâņgâm kârigeân. Momoņe me manmanņe me aņeloņe me luâk kembuņe me hinņe miawakmapņe me beirâ miawakbiapņe me siâ me siâ kârikņe arekņe ³⁹ me siâ siâ âgâņe me siâ siâ gegeņe me wan me wan Anutuņe liulep arekņe Anutugât han kalemņande Yesu Kristoņe katip nengumap ain ba bo oloņnenekbiap.

Pauloņe Yuda luâk yengât yai nâņgâep.

9 ¹ Nâ Kristogât akmâ den bunņe maktere nâņgâņet. Heakņe hanne mem pagalembo nâņgâm heņgemgom makyenģiwe. ² Nâņe nâņgât ginbailupne Yuda gâtņe yâkgât akmâ nâņgâyengire biwine umatņe dondâ akmap. ³ Aregât hin nâņgân mon? Anutuņe Yuda luâk galalupne yâkgât akmâ hepun nekmâ âmâ meyekbiap are nâņgâm owâiân. ⁴ Yuda luâk nengât kotnenņe siâ Israegât kâmotlupņe are Anutuņe nâņgât mândulupnerâm ikinæet pagaleņe hekatyengiep. Hain akmâ âmâ Anutu olop dewatiwaigât pat akto den kârikņe makmâ miawak yengiep. Akto sumbegât emetņe aregât hin akņetgât dâpņe keiņe hekatyengiep. Akto siân wan me wan hârok yengiwian dâm makmâ hâre yengiep. ⁵ Dâ Yuda nengât hakulupnenņe amâ luâk kautņe mali. Akto Anutuņe nanņe huņganaņdo giep are amâ nengât hutnenņânba miawagep. Yâk âmâ wan me wan hârok nengât kautņe malep, yâk âmâ Anutu aregât nenņe nâņganđenņe humoņe humo kârikņe talaņbiap. A bundâk. ⁶ Dâ ya makyenģiân aregât hin bo dâwaen, “Yuda luâkņe wan akmai aregât Anutugât den yeukņe agep.” bo dâwaen. Israe gâlân ba miawagion âmâ Israe luâk bunņe hârokņe ârândân bo agi. ⁷ Dâ Abrahamgât uliklupņe miawagi are âmâ kâmotlupņe bunņe gai bo agi. Gârâmâ aregât Anutuņe makto Moseņe hin kulengoep, “Abraham gâņgât nanņe Isakagât kâlegenlupņe amâ gâņgât pat akbai.” ⁸ Den aregât keiņe hin tatâp. Abrahamgât kâlegen gâtņe hârok âmâ Anutuņe mândulupnerâm bo yengonmap. Anutuņe makmâ hâriewân miawagi yâkņeak Abrahamgât

kâlelupne bunje agion. ⁹Aregât Anutugât denje hin talep a bunje agep, “Hombaŋ kakjân sop miawakto Sara nanaj mem mandoân purikatbian.”

¹⁰Akto areâk bo. Rebeka âmâ luâkne hakunenje Isaka yâk olop manmâ nanaj lâuwâ megolak tepne agep. ¹¹Tepne akto nanaj lâuwâ bo miawakmâ maliat ain bâleje me âlepne bo agialân Anutuje yâk yetgât hin magep, “Teuŋande emiŋaet hoj manbiâp.” ¹²Amâ Anutu ikinje hanjaet den are kârikne agâk gât nâŋgâm nanaj manman yetjaet bo makmâ kârigiep. Ikiŋaet hanjaet mem potat yelemâ kinmâ hain magep. ¹³Aregât Anutugât den bikne hin tatâp, “Nâje Yakobo âmâ han kalem agaŋmâ okot âlep nâŋgân. Dâ Esau âmâ hâkân agaŋdân.”

¹⁴Akto aregât gain dâweren? Anutuje wan me wan mendo bo ârândân akmap? A borondâje. ¹⁵Ulikjân Anutuje Mose hin maganejep,

“Luâk me âmbâle siâ are okot âlep agaŋdere ârândân akmap. Akto luâk me âmbâle siâ han kalem agaŋdere ârândân akmap.” dâep.

¹⁶Aregât keiŋe hin. Anutuje luâk hanyejaet me âiyejaet bo nâŋgâyengimap. Anutu ikinje han kalemjaelâk nâŋgâm makmâ potat nenekmap. ¹⁷Aregât keiŋe Anutugât denjande Parao hin maganejep, “Nâ gâŋgâlân kârikne mem miap pandere hân ârândân ariâkgât dâm kat gegân.” ¹⁸Aregât Anutuje âmâ luâk siâ han kalem agaŋberâm âmâ âlepne agaŋbiap. Dâ luâk siâ han biwiŋe gisapkoanberâm âmâ âlepne gisapkoanbiap. Amâ ârândân akmap.

Yuda luâkne Anutu hamiaŋi.

¹⁹Are oyaŋmâ yengâlân gâtje siâje hin makniŋbiap mon? “Anutuje wan me wan akberâm dâambo luâkne bo miawagâk gât horat kalaŋbiapgât dop bo tatâp aregât Anutuje luâk nengât nâŋgâmbo bâlimap are bo ârândân aktâp.” dâm makniŋbiap mon? ²⁰Wei gâmâ luâgâk. Wangât Anutu den hâuŋe maganbiat? Aregât den dopne hin makbe. Wangât umbâje luâk umbâ mângimap are hin maganbop, “Gâ wangât tiripne hain are mânginegen?” ²¹Aregât umbâ mângimap luâk arekne hân numje mem umbâ bikne luâk yâk yengât pat mângiwop. Dâ bikne dua bau yâk yengât mângimbo ârândân akbiap. ²²Amâ Anutuje kuk akto kârikne tektekjan kato ekbaigât umbâ bikne hogom panyekbiapgât nâŋgâyengim bo hâkân akyengiep. ²³Hain akyengim umbâ bikne han kalamjaet pat maleine beirâ egâlian pagalenjan kâmot katnenegâk gât nâŋgâmbo yendâp. Umbâ are nengâlân egâlian unsambe nengiepgât menenekmâ manmap. ²⁴Dâ aregât amâ Yuda luâk âmbâleâk bo. Hân siâ siâ Yuda luâk bo manmai aregât nen han kalemjaet pat aknegât oloŋ nenegep. ²⁵Akto Anutuje propete Hosea hin maganjo kulengoep,

“Luâk kâmot ambo bo akyengiân yâk nâŋgât luâk âmbâlelupne yengonmâ makyengiwan. Akto âmbâle okot han kalemje bâlâk malep yâk nâŋgât dâtâne dâm konbian.”

²⁶ Akto den siâ hin,

“Nâje ye nânġât luâk âmbâlelupne bo dâm makyenġiân ain kotyeje Anutu manman ambojaet nanne baratne yeŋgonbian.” dâep.

²⁷⁻²⁸ Dâ areâk bo. Yesaiaje Israegât hin magep,

Kembuġe hânân denjaet bunje dowâġâk mem miap pando kârigewiap aregât Anutuġe hin dâep, “Israegât kâlelupne haruân nupi yendâp aregât dop miawakmâ manbai nâje hutġânba konok konok mem oloġyektere manman âlepġân manbai.” dâep.

²⁹ Akto Yesaiaje beirâ miawakbiapgât hin magep,

“Humonenje kâmot kârikġe Humo Amboyeġande hutnenġânba konok konok bo oloġ nenekto dâine âmâ Sodom Gomora itinj gulam agiat hain are akbâen.”

Yuda luâkġe âlepġe aknegât ewum hâumgoyi.

³⁰ Aregât ire gain dâweren? Hin mon? Luâk Anutuġât kotġe bonânġâmaiġe âlepġe akġetġât bo nânġâmâk watmâ manmai yâk âlepġe manmaigât memai. Are amâ Kristo nânġaġmaigât memai. ³¹ Dâ Israe luâk den kârikġe lokom kinbiâ Anutuġe yekto huraguâkġât kârikġe agi. Kârikġe akmâ den kârikġe bo lokom âlepġe bo akmâ âmâ umale agi.

³² Amâ wangât? Hingât. Yuda luâk âmbâle arekġe Kristo nânġâ aġbaigât pat bo wali. Yân agak memeyeġe aregât âlepġe aknegât hain agi. Are amâ dâwân kât yiep ain keiyeġe kondo kâwâwâġ kârâyi. ³³ Aregât Anutuġe hin makto Yesaiaje kulemgoep,

“Nânġâi. Nâ Sioġ gimbânân kât siâ katere tatbiap. Arekġe keiyeġe erâmbo peġ panyekbiap. Akto kât humo katberân ain kom heweweġ panbai. Dâ siâġe nânġaġbiap âmâ bo pâpkom aġun aġiwiap.”

Yuda luâkġe Anutuġât den hâkâġe dâyi.

10 ¹ Galama, nânġât kâmot Yuda luâk âmbâle are Anutuġe meyekbiapgât hannande dondâ hâwât nekto Anutu aregât ulilaġman. ² Amâ yâkġe Anutuġât âi mendenġe huraguâk dâm kârikġe akmâ manmai. Dâ amâ pâpkom kinmâ akmai. ³ Yâkġe Anutuġâlân ba dosa bâlâk aknegât dâp yendâp aregât pâpkomai ġât yeġeak âlepġe aknegât âiġe kârikġe memai. Hain akmâ Anutuġe yekto huraguâk ġât dâp hâkâġ akmai. ⁴ Aregât keiġe hin. Kristoġe den kârikġe are lokombo bo agep. Aregât luâk âmbâle siânbaġe Kristo nânġaġbiâ âmâ Anutuġe dosayeġe bo dâm yeŋgonmap.

⁵ Aregât Moseġe hin kulemgoep, “Luâk siâ den kârikġe are hârok lokore Anutuġe nekto huraguâk ġât manbiap yâkġe den kârikġe hârok lokombo âmâ âlepġe manmanân manbiap.” ⁶ Dâ Kristo nânġaġbiâ Anutuġe yekto huragumap ġât den hin yendâp, “Niġande himbimân âġâm

Kristo mem oloŋdo gewiap? ⁷Me niŋande hememân gem Kristo momoŋe yâk yengât hutyeŋâmba oloŋdo gawiap? Ye hain bo dâwai.” ⁸Anutuŋe magep hin tatâp, “Anutugât denŋe kâlewângen bo tatâp. Enemân akto biwigân yendâp.” Are amâ biwi kat katgât den pat âlepŋe nâŋgâŋetgât makyengimaen. ⁹Amâ Yesu amâ Kembune dâwiat akto biwigân Anutuŋe Yesu momoŋânba mem agalep dâm nâŋgâm kepilâwiat benŋe Anutuŋe heŋgem gugumbo manman âlepŋân manbiat. ¹⁰Aregât han nenŋande Yesu nâŋgaŋmâ amâ dosa bâlâk manmaen. Akto launenŋande makmâ miap panmâ mandenŋe Anutuŋe heŋgem nengumap. ¹¹Aregât Anutugât denŋande hin dâep, “Siâŋe nâŋgaŋbiap amâ bo pâpkom aŋun aŋgiwiap.” ¹²Amâ Yuda me Girik luâk potat potat bo yendâp. Humo Kembu konokŋe amâ hârokgât Kembunenŋe mandâp. Yâkŋe luâk me âmbâle bikŋande yâkgât kotŋe konbiâ amâ ainâk han kalem akyengim wan me wan âlepŋe potatmâ yengwiap. ¹³Aregât Anutugât denŋande hin dâep, “Niŋe me niŋe Kembu kondo amâ ainâk Anutuŋe mem heŋgemgo aŋbiap.” ¹⁴Gârâmâ luâk âmbâleŋe amâ Kristo bo nâŋgaŋmai amâ gain gain kotŋe konbai? Akto siâŋe Kristogât keiŋe bo makyengimbo amâ gain gain nâŋgaŋbai? Akto den pat âlepŋe makmaen nengâlân gâtŋe konokŋe bo arim makyengimbo amâ gain gain den pat âlepŋe nâŋgâwai? ¹⁵Akto Anutuŋe bo huŋgunaŋdo amâ gain gain arim makyengiwai? Anutuŋe makto siâŋe hin kulengoep, “Pat âlep den makmak luâk togombiâ amâ, munŋande han nâŋgâ nâŋgânenŋe mem owâimap.”

Anutuŋe Yuda luâk âmbâle yengondo bo nâŋgaŋi.

¹⁶Den pat âlepŋe ire amâ luâk hârokŋe bo nâŋgaŋmâ bunŋerâm kepilâyi aregât Yesiaŋe hin magep, “Kembu, den pat âlepŋe makmâ miawaktenŋe siâŋe bo nâŋgaŋmâ kârigiep.” dâep. ¹⁷Aregât hin nâŋgâweren. Siâŋe Kristogât pat makyengimbo den bunŋe nâŋgâmaen. Akto den bunŋe nâŋgâenŋe amâ biwi kat katgât miawakmap. ¹⁸Gârâmâ aregât hin aiyenŋuân. Luâk âmbâle amâ den pat âlepŋe are bo nâŋgâyi mon? Hain bo. Anutuŋe makto siâŋe hin kulengoep.

Denyenŋande hânŋe hânŋe sambelem ârândân agep. Akto den lauyenŋande hân tunŋuŋângen ârândân agep.

¹⁹Aregât gaetŋe hin aiyenŋuân, Israe luâk bo nâŋgâm heŋgemgoyi mon? Hain bo. Ulikŋân Moseŋe hin kulengoep,

“Anutuŋe hin dâep, Nâŋe luâk yânŋe meyektere ye ewangiyekbiâ nâŋgâmbiâ bâliwiap. Akto luâk kâmot bo nâŋgâ niŋbai are oloŋyektere yekmâ biwiyenŋe kâlâp akbiap.” dâm kulengoep.

²⁰Akto beirâ Yesiaŋe den umatŋe mem gem makmâ amâ bo aŋun aŋgim hin dâep,

“Anutuŋe hin dâep, Bo kulâgât nekmâ maliŋe penâniŋi. Nâŋgât bo makmâ mali yâk yengât mete katyenŋiân.” dâep.

²¹Hain akmâ Yesaianje Israe luâk yâk yeŋgât hin makmâ kulengoep, “Anutuŋe hin dâep, Nâ luâk kâmot nâŋgâm gulip agakŋe akto den kokoŋe sop kâlep ganjet dâm yeŋgonmâ mandere bo togoyi dâep.” dâm kulengoep.

Anutuŋe Yuda luâk bikŋeâk ikiŋaet pat meyegep.

11 ¹Aregât nâ hin aiyenŋuân, Anutuŋe Yuda luâk hârok hepunnenegep mon? Bo. Hain bo agep. Amâ nâkai Israe gâtŋe manmâ gan. Akto hakune amâ Abraham. Akto nâmâ Bensamiŋ kâmolân gâtŋe mandân. ²Anutuŋe Israe bo hepun nenegep amâ hingât. Ulikŋân luâk nâŋgâyeŋgim potatyegep amâ bo hepun yekmap. Amâ ye Anutugât denŋe are bo oyaŋmâ nâŋgâmai mon? Eliaŋe Israe luâk yâk yeŋgât akmâ Anutu hin dâm maganep, ³“Kembu, Israe luâkŋe propete yeŋgum âmâ sumbe kat katgât are patakom itiŋ gulam meyi. Dâ nuneâk mandere gai nuguwerâm aktâi.” ⁴Hain dâambo den hâuŋe gain purikalanep? Hin. “Nâ luâk 7,000 koratyenŋure lâpio kotŋe Baali yâkgât bo kâŋgoaji.” ⁵Anutuŋe hain dâepgât hin nâŋgâne. Anutuŋe han kalem akmâ Yuda luâk bikŋe mem kepilâ yegepgât mandâi. ⁶Aregât Anutuŋe han kalemŋaet akyenŋiep. Akyenŋiep gât âmâ agak meme yeŋaet bo akyenŋiep. Hain bo akto dâine âmâ han kalemŋe bunŋe bo akbop.

⁷Akto gain gain nâŋgâweren? Israe luâk yâkŋe Anutuŋe nenekto huraguâkgât kulâgâtâm âi humo meyi, are bo mem miawagi. Dâ Anutuŋe mem kepilâ yegep yâkŋe âmâ meyi. Bikŋe humo âmâ Anutuŋe makto biwiyeŋe kârik agi. ⁸Aregât Anutugât denŋân hin tatâp,

“Anutuŋe han yeŋe mem gâlikoep. Akto dewunyeŋe gai mem limbâpkoep. Akto ondopyeŋe mem gisapkoep. Gisapkombo gam gam maleine uŋak hainâk yu mandâi.

⁹Akto Dawidiŋe hin dâep,

“Anutu, gâŋe makmenâ sot nem tatbiân âmâ sot akto kat katyeŋande lâlâmbâlân dowâk peŋ panmâ yeŋguâk. Akto wan me wan agigât hâuŋe hân dâpŋân gewai hainare miawakyenŋiwiapgât makmenâ miawagâk. ¹⁰Gâ dewunyeŋe mem limbâp komenâ dewun bok akbai. Dâ hamiyenŋe mem goŋgoŋgomenâ pâit pâitŋe akmâ manmâ âgâwei.” kulengoep.

Anutuŋe kâmot siân gâtŋe ikiŋaet pat meyegep.

¹¹Akto hin aiyenŋuân. Israe luâk yâkŋe mokmok mem peŋ panmâ mom bo akbaigât hain miawagep mon? Hain bo. Israe luâkŋe bâleŋe agigât Anutuŋe Israe gâtŋe bo manmai meyegep. Meyekto âmâ beirâ Israe gâtŋande Israe gâtŋe bo manmai manman âlepŋân manmai are yekbiâ bâliwiapgât. ¹²Akto Israe luâk âmbâle bâleŋe agi aregât den pat âlepŋe hânŋe hânŋe ârândâŋ arim metiep. Akto Israe luâk âmbâle

yeuknje akbiâ Anutugât pat bo miawakyeŋgiep gât Yuda luâk bo manmai yâk yeŋgâlân den bunje peniyenŋiep. Yei, maleine Anutuŋe Yuda luâk hârok meyekbiawân âmâ hârok bunje miawaknengiwiap.

¹³⁻¹⁴Galalupne, hinje Yuda luâk bo manmai ye den ire makyenŋire nânŋâŋet. Nânŋât kâmot hâwât yektere bikŋande nâ watnekmâ âlepŋe akŋetgât Yuda luâk bo manmai yeŋgât Aposolo manman. Akto âine egâlian kakŋân meman. ¹⁵Akto Anutuŋe Israe luâk hepunyegep gât âmâ Anutuŋe hân ârândânŋan manmai yâk meyegep. Arekŋe Israe luâk meyekbiawân amâ momoŋân ba golâ manbaengât miawakbiap. ¹⁶Akto sot ulikŋe Anutu waŋdenje mendâp benje sot hârok ârândân akmap. Dâ lâwin kândârânande ârândân yendo gai bât bâtŋe gai hainâgâk ârândân yembiap. ¹⁷Den ginŋe siâ hin makbe. Anutuŋe bât bâtŋe bikŋe hârem panmâ aregât welanŋân oliwa pâloŋâŋen miawagep aregât bâtŋe gâ Yuda luâk bo manmat oliwagât tuŋe membiatgât katgekmâ dewatigegep. ¹⁸Aregât gâŋe lâwin bât bâtŋe tâmbâŋe Yuda luâk yâk bo nânŋâyenŋimenâ gembo âmâ agat agat bo akben. Hain akbâtgât hin nânŋâwen. Gâ lâwin kândârâŋe are bo damunŋe akmâ heŋgemgomat. Kândârâŋe Yuda luâk arekŋe ge tân gugumai. ¹⁹Gârâmâ hin dâwerât mon? Anutuŋe nânŋât akmâ katmâ dewatinegâk gât bât bâtŋe tâmbâŋe are liŋgâtmâ palep. Panmâ nâ dâgâm dewatinegep. ²⁰Gâ Yuda luâk bo manmat amâ bundâk maktât. Anutuŋe Yuda luâk manmai arekŋe bonânŋanŋi gât hârem panyegep. Dâ gâmâ Anutu nânŋanŋmatgât kindât aregât hâkge bo mem agatmâ âmâ kânŋom manben. ²¹Amâ Anutuŋe oliwa ikinŋe bât bâtŋe bo yaigoepgât gâ hainâgâk bo yaiguguwiap. ²²Aregât gâ han kalemgât akto Anutuŋe hâmbiŋ yekmapgât bo nelâmŋiŋbiap. Hâmbiŋ yegepgât den bunje hamianŋi yâk yeŋgâlân hâuŋe miawagep. Dâ han kalemŋaet bunje are âmâ gâŋgâlân emelâk miawagep. Aregât gâ yâkgât han kalemŋaet akmâ nânŋanŋmâ manmenâ bunje âlepŋe miawakbiâp. Dâ hain bo akmenâ âmâ gâ gai hârem pan gekbiap. ²³Akto bât bâtŋe tâmbâŋe yâkŋe biwi kârikyeŋaet hepunbaiân Anutuŋe lâuwâŋe dewatim katyekbiap gât kârikŋe talaŋdâpgât meyekmâ dewatim katyekto ârândânŋ akbiap. ²⁴Akto Anutuŋe oliwa kâit meŋgekmâ oliwa emesa lâwinŋan dopyeŋe bo tatâp ain katmâ dewatim katgegepgât bo pâpkomap. Aregât oliwa emesa ikinŋe bât bâtŋe gaetŋe mem dewatiyekbiapgât âmâ âiŋe owâiŋe akbiap.

Anutuŋe Yuda luâk han kalem akyenŋiwiapgât keiŋe.

²⁵Galalupne, ye yeŋaet nânŋâ nânŋâyene nânŋâmbiâ humo akbopgât den iregât keiŋe makyenŋiwe. Anutuŋe Israe luâk bikŋe han biwiyeŋe gisapkoep. Gisapkombo âmâ beirâ Yuda luâk âmbâle bo manmai dondâ Kristogâlân dewatimbiâ âmâ ²⁶âlepŋe Anutuŋe Israe luâk kâmot hârok meyekto âlepŋe akmâ metewai. Aregât den Anutuŋe makto Yesaianŋe hin kulemgoep,

“Sioŋ gimbanjanba luâk siâŋe heŋgemgom nengiwiaŋe miawakmâ Yakobo gâlânba gagap higenŋe hambuŋe uruto ariwiap. ²⁷Hain akto nâ bâleŋe yeŋe puliwianân ain nâ olop manbaigât makmâ hâreyenŋiwian.”

²⁸Israe luâkŋe amâ Yuda gâtŋe bo manmai yâk yeŋgât akmâ pat âlep dengât gasa manmai. Dâ Anutuŋe ikiye han kalemŋaet akmâ kepilâ yekbiapgât akto hakulupnenŋe yâk yeŋgât akmâ okot âlep dondâ akyenŋimap. ²⁹Amâ Anutuŋe wan me wan nengimap are akto oloŋ nenekmap aregât pat bo hilipkombo yeukŋe akmap. ³⁰Ye ulikŋân den koko akmâ mali akto Israe luâk yâkŋe gai den koko akmâ mali aregât Anutuŋe ye han kalem akmâ meyegep. ³¹Hainâgâk Yuda luâk yâkŋe han kârik akmâ den koko akmâ manmâ gayi Anutuŋe ye han kalem akyenŋiep gât yâk gai hain kalem akyenŋiwiap. ³²Anutuŋe luâk hârok den konogân manmai dâm nânŋâm heŋgemgoep aregât luâk hârok oloŋ nenekmâ han kalemŋân katnenegep.

Anutu humo yâk konok mepaiŋe membaen.

³³Yei Anutugât han kalem unsambe akto nânŋâ nânŋâŋe humo agat agatŋe talaŋmap aregât bâtgumŋe pikmâ yeŋmap. Yâkŋe makmâ kepilâ kepilâ akto makmâ kotgâ kotgâŋaet keiŋe luâkŋe bo nânŋâwâen. Dâ âi memenŋaet dâp are gai luâkŋe bo ekmâ heŋgemgomaen. ³⁴Kembugât hanŋân den yendâp, are luâk niŋande nânŋâep? Dâ Kembuŋe den makmâ kindo ain niŋande dengât tângom magep? ³⁵Dâ niŋande wan me wan Anutu waŋdo ârândânŋe agepgât hâu are kutigilaŋbiap? ³⁶Amâ siâ me siâ hârok yâkgâlânba togomap. Akto yâkŋe wan me wan ketugumbo ârândânŋe akmap. Akto yâkŋe hârok damunŋe akmap. Aregât egâlianŋe pagaleŋe yâkgâlân dewatim dewatim yem âgâwiap. A bundâk.

Hâknennande Anutugât sumbe akbiâp.

12 ¹Aregât galalupne nâ Anutugât han kalemŋaet akmâ den sami makyenŋire nânŋâŋet. Ye hâkyeŋe Anutugât sumbe golâ kotgâm waŋbiâ nânŋâmbo âlepŋe ârândânŋe akto ekto huraguwiâp. Hain akbai âmâ Anutu hoŋ manman bunŋe manaŋniâm. ²Akto agak memeyeŋe hânŋâlâk nânŋâm manmai dop are bo akbiâp. Anutuŋe hanyeŋe nânŋâ nânŋâyeŋe mem purikatberâmbo owâi akmâ nânŋâmbiâ humo agâkgât Anutugât han âlepŋe ârândânŋe are miawakyekto ekmâ egâlianŋe.

³Anutuŋe han kalem niŋep gât ye hârok makyenŋire nânŋâŋet. Siâŋe ikiyeŋe nânŋâmbo âgâ âgâŋe bo akbiâp. Anutuŋe den dâtâŋe waŋdo nânŋaŋdo dop areâk akbiâp. Amâ ikiyeŋe nânŋâmbo humo bo akbiâp.

⁴Amâ hin nânŋâŋet. Hâk pânŋenŋe amâ konok. Dâ kei bâtnenŋe biwirâŋe âi keiŋe keiŋe memai. ⁵Aregât dop hainâk nen amâ dondâ dewatienŋe hâk pânŋ nenŋe konok aktâp. Aregât kei bâtŋe tân agu agu

akmaen. ⁶Anutuŋe wan me wan keiŋe keiŋe han kalemŋaet akmâ nengiep are ârândâŋ tatnengiep. Aregât dopŋân âi meniâm. Aregât Anutuŋe den lau makmâ miawakbiapgât Anutu nânŋanŋmaengât dopŋân makmâ miawakbaen. ⁷Anutuŋe hoŋ manman âi nengiep amâ âi are kârikŋe akmâ owâiŋeâk akmâ membaen. Siâŋe Anutugât den makmâ kepikmâ makyenŋimap amâ âi are membiâp. ⁸Biwiyeŋe gewop gât den sami makmap yâk aregât kârikŋe yeandâpgât makbiâp. Dâ luâk siâŋe âmâ galalupŋe wan me wan yeŋgiwerâm âmâ hâuŋaet bo nânŋâm yân han kalem akmâ yeŋgiwiâp. Dâ luâk siâŋe Yesugât puligât damunŋe akmâ luâk âmbâle umburuk yeŋgiwerâm âmâ biwi owâiŋeâk akmâ dowâk tânyenŋuwiâp. Bikŋe kundatdâŋe umatŋânâk manmai are siâŋe okot nânŋanŋmâ tângowerâm âmâ mâru guru kakŋân tângowiâp.

Han kalemgât den.

⁹Han kalem agak are hâkŋeak bo akbei. Siâ me siâ bâleŋaet hâkân yekbiâp. Dâ siâ me siâ âlepŋaet âmâ egâlianŋei. ¹⁰Ye gala agak bunŋe akmâ han aŋgi goaŋgi akŋetgât kârikŋe akbei. ¹¹Konam bâlâk kârikŋeâk manbei. Biwi yeŋande owâiâkgât damungom manbei. Kembunenŋe hoŋ bawa agaŋbei. ¹²Anutuŋe wan me wan katyenŋiep aregât nânŋâm egâlianŋmâ manbei. Dâ hâk hilâlâm kakŋân manmâ âmâ bo hâkân akmâ manbei. Akto hokboâk hokboâk Anutu ulilaŋmâ dewatim mem manbai. ¹³Kristogât luâklupŋe umburuk manbai âmâ dowâk wan me wan bo talaŋbiap are waŋbei. Akto lombo togombiâ âmâ dowâk owâiŋeâk gala akyenŋiwei.

¹⁴Bikŋande yeŋgum watyekbiâ âmâ yâk yeŋgât akmâ Anutu ulilaŋbei. Sait den bo makyenŋiwei. ¹⁵Bikŋande heronŋe maronŋe manbiâ âmâ yâk olop heronŋe maronŋe akmâ tân yeŋguwai. Dâ bikŋande indem tâgâiak akbiâ âmâ are tânyenŋum olop indewei. ¹⁶Hanyeŋe mendugum kinmâ siâ me siâ konokgât han kalem akmâ manbei. Yeŋaet nânŋâmbiâ dondâ bo âgâwiâp. Nen gegeŋe dâmai are dowâk tânyenŋum maŋganyekbei.

¹⁷Siâŋe bâleŋe akyenŋimbo âmâ bâleŋe bo agaŋbei. Dâ luâk âmbâle hârokŋe wan nânŋâmbiâ ârândâŋ akbiap âmâ areâk nânŋâmâk manbei. ¹⁸Ye han kau kau akmâ luâk âmbâle hârok gala akyenŋim manbei. Amâ bikŋande hâkânŋiŋbiâ âmâ hanâk dosane bâlâk manbe dâm gala akyenŋiwei. ¹⁹Galama, bikŋande kuk hengân akyenŋimbiâ âmâ dosayeŋe yeŋeak bo makmâ hâreaŋgim manbei. Kembunŋe kuk are hâuŋe meâkgât lâmgom manbei. Aregât Anutugât denŋande hin dâep, “Dosa kotgâ kotgâgât âi amâ nânŋât. Aregât dosayeŋe mem hâuŋe yeŋgiwian.” dâep. ²⁰Gârâmâ ye hin akbei. Gasagande sotgât momberân dâmbo sot waŋben. Tugât nânŋâm dâmbo tu waŋben. Gâ hain akmâ âmâ kâlâp kautŋân katbiat dop hainare miawakyeŋgiwiap. ²¹Bâleŋande gâ bo mem ge katbiâp. Aregât gâ siâ me siâ âlepŋe akmâ bâleŋe aregât kârikŋe komenâ gewiâp.

Kiap gawaman yengât den.

13 ¹Humomolupnenne, kiap, gawaman akto kaunsoli âmâ Anutu konok arekne luâk nengât damunnenne manbeigât katyegep aregât nen hârok yâk yengât den lokoenne ârândân agâk. ²Aregât luâk siâne gawaman yâk yengât den kom âmâ Anutugât den gai kombiap. Hain akbai âmâ hâune membai. ³Amâ hingât. Humomolupnenjande amâ agak meme âlepne bo mem ge katmai. Dâ agak meme bâleje aregât hâune yengimbiâ hamewakmâ manmai. Aregât gâne humomolupnenne yengât akmâ hamep bâlâk manberâm kinmâ siâ me siâ ârândân akben. Siâ me siâ ârândân akmenâ gângât nângâmbiâ ârândân akbiâp. ⁴Gawaman nenne amâ Anutugât hoj bawa manmâ tân gugumbiâ âlepne manbiatgât âi memai. Gârâmâ gâ bâleje akmâ membiat âmâ hamewakben. Yâk bugâ hanâk bo konmai. Bo. Yâk âmâ Anutugât hoj bawa manmai aregât bâleje meme luâk yâk yengâlân Anutugât kuk miawakyengiâp dâm âi mem kinmâ hâune yengiwei. ⁵Aregât den lauyeje lokom hengemgowe. Are âmâ Anutuje hâune nengiwiapgât hamep gâlâk bo. Amâ guge hangande mokmok membopgât hangande kau kau akbiâp.

⁶Anutuje damun âi damunyeje agep are memaigât yeje gawaman puli dâtâne are yengimai. ⁷Aregât yeje yâk wan makmâ hâreyi are ârândân yengiwei. Puligât dâtâne magi are dopnân puli yengiwei. Dâ hoj manmangât dâtâne makmâ hâreyi âmâ hoj manyengiwei. Kângo nenginet dâm hâreyi âmâ hainakmâ akyengiwei. Lau nenne lokowe dâm hâreyi âmâ lau yeje lokowe.

Gala konok mannegât den.

⁸Akto siâ me siâgât hâu are dowâk kotgâmbiâ bo akbiâp. Dâ hâu konok tatyengiwiâp amâ hin, han kalem akmâ okot angi goanji akjetgât membiâ bo bo akbiâp. Aregât han angi goanji olop manmapne âmâ den kârikne lokomapgât dop akmap. ⁹Anutugât denjande hin maktâp, “Luâkdâ âmbendâgât pat bo hârewen. Gâ bugâ bo koben. Gâ kâmbu bo memben. Gala siâgât siâ me siâ are nângât bo dâwen.” Den kârikne aregât bikne hârok mendugum kautne konok katmâ hin dâep, “Gâ guge tân agumat dop hainâk luâk siâ tângowen.” ¹⁰Han angi goanji olop manbiapne âmâ gala je bâleje bo agaŋbiap. Aregât han kalem akmâ okot âlep akyengiwaen âmâ den kârikne hârok lokowaengât dop miawakbiap.

Pagalejân manbaen.

¹¹Akto hain akjetgât sop iregât keje nângâi. Nen ulikjân Kristo nânganjenne hengem nenguwiapgât dâp miawaktâp. Dâ hinne hengem nengum metewiapgât sop ewumâk aktâp. Aregât asiŋanba golâ akmâ agatbei. ¹²Hândâk pipine akto emet haunberâmgât hândâkgât siâ me

siâ guŕmâ panmâ âmâ pagalenjaet tembe mâron meakmâ manbaen. ¹³ Yanep pagalenjân manmaenje ârândânjâk manniâm. Are amâ sot songo nem munej bo akbaen. Akto tu kârikje nem gulip bo akbaen. Akto agak meme bâleje anjun olowâk are bo mem manbaen. Me gasa akmâ bo potalakbaen. Me siâgât nângâenje bo bâliwiâp. ¹⁴ Gârâmâ Kembu Yesu Kristo yâk luguakmâ âmâ benje hâkyeŕande egâlianj bâleje peniaŕbopgât nângâmâk nângâmâk manbei.

Galagât nângâmbiâ bo gewiâp.

14 ¹ Galalupne, luâk âmbâle bikŕande Kristo getegâk nânŕanmai are dowâk gala akyeŕgiwei. Amâ galagât heyeŕgienje penânengimbiâ ain nângâ nângâyeje gewiapgât papalakmâ manbaengât bo. ² Luâk siâ biwi kat kat kârikje talaŕmapje âmâ sot hârok hanâk nemap. Dâ siâ biwi kat kat yeukje talaŕmapje âmâ gârânjâk nemap. ³ Aregât luâk siâne sot hârok nemapje amâ galaŕe songo bo nemap aregât bo nânŕanŕo gewiâp. Akto luâk songo bo nemapje amâ galaŕe sot hârok nemap are den âiân bo katmâ kotgâ anjbiâp. Amâ Anutuŕe galaŕe gala agaŕepgât. ⁴ Aregât gâ wangât Anutugât lau lokomapje den âiân katbiat? Amâ bo ârândânj akbiap. Yâk amâ Anutu Humoŕjaet enemjân kinmâ kârikje akbiap me yeukje akbiap. Are âmâ Kembugât pat. Gârâmâ hin nângâne. Humoŕe âlepje tângombo kârikje akmâ kinbiapgât bo yeukje akbiap. ⁵ Hainâk luâk siâ hilâmgât âi meme siâ nângâmbo gembo siâ nângâmbo humo akmap. Dâ luâk siâ âmâ âi meme hârok nângâmbo ârândânj akmap. Aregât siâ me siâne hin me hain akberâm nângâm heŕgemgom kârigem kinmâ akbiâp. ⁶ Hilâm âi meme oyaŕmâ potatmapje amâ Kembugât akmap. Dâ Anutu mepaiŕe memapgât Kembugât pat akbiap. ⁷ Aregât keiŕe hin. Nengâlânba siâne ikiŕe kârikjân bo manbiap. Dâ ikiŕjaet akmâ bo mombiap. ⁸ Manman nenje amâ Kembugât akmâ manmaen. Dâ mombaen amâ hainâk yâkgât akmâ mombaen. Aregât manbaen me mombaen are amâ Kembugât pat. ⁹ Akto Kristoŕe momoŕe akto golâ yeŕgât kautje akmâ damun nenje akbiapgât mom âmâ golâ agep. ¹⁰ Akto gâ wangât gala den âiân katmâ hâkje tunmâ akmat? Me wangât galagaet nângâmenâ gewiap? Nen hârok Anutuŕe makmâ hârenengiwiapgât tat tatgât enemjân kinbaen aregât galagaet bo makmâ kotgâwiat. ¹¹ Anutugât denjande hin dâep.

Kembuŕe hin dâep, “Nâ mandângât luâk âmbâle hârokje nâ pâwut liginiŕbai. Akto hârokje kotnaet nângâmbiâ humo akto makmâ mem owâiŕe ketugunekbai.” dâep.

¹² Aregât nen hârok Anutugât metejân kinmâ keinenje makmâ miawakbaen. ¹³ Aregât nen nenjeâk den âiân bo makmâ bo hâk nenje tunmâ anŕi goanŕi akbaen. Dâ hin aktenje ârândânj agâk. Galalupnenje han gulip akbâigât wan me wan bâleje dâpyeŕjân bo katenje keiyeje bo

perj panbei. ¹⁴Nâ Kembu Yesu olop mandân aregât hin nângâm kârigeân. Sot siâ siâ nendere amâ bâleŋe bo akniŋmap. Gârâmâ siâŋe sot siâ me siâ ire nem bâleŋe miawak niŋbop dâm âmâ hanâk nemiap yâk âmâ bundâk bâleŋe miawagaŋbiap. ¹⁵Aregât gâŋe galagât sotgât bo nângâm hanoko agaŋmenâ hanŋe mokmok membiâp amâ han kalemŋaet pat bo akmat. Galage âlepŋe agâkgât gai Kristoŋe yâkgât akmâ moep. Aregât nângâm galagande sotgât nângâmbo umatŋe akmapgât nângâmâk akmâ nem manben. ¹⁶Ye siâ me siâ membiâ ârândâŋ akmap are luâk bikŋande nângâmbiâ gewopgât damunŋe kârikŋe akmâ manbei.

Sot soŋgoŋe manman kârikŋaet tân bo akbiâp.

¹⁷Akto luâk âmbâle bikŋe Anutuŋe damun nenŋe akmap sot bikŋe sapa aktenŋe ârândâŋ akbiap dâm âmâ Anutugât keiŋe bo nângâmai. Anutuŋe damun nenŋe akmap aregât keiŋe amâ hin. Anutuŋe nenekmâ dosayeŋe bo dâm ikiŋe Heak nengimbo tân nengumbo Anutuŋe denân bo katnenekbiap dâm heronŋe aktenŋe biwinenŋe sândugemap. ¹⁸Siâŋe dâp are tâlim Kristo hoŋ manaŋdo are Anutuŋe ekto âlepŋe akbiap. Akto luâk bikŋande gai nâŋgaŋbiâ ârândâŋ akbiap. ¹⁹Aregât nen gala tân agu agu akmâ kindenŋe biwinenŋe sândugeâkgât kârikŋe akniâm. ²⁰Gâ sotgât akmâ Anutugât âi are bo itiŋ gulam memben. Amâ sot soŋgo are âlepŋe hârok. Gârâmâ gâ hanâk hanâk nem manmenâ galagande gekto bo ârândâŋ akto hanŋe bâlimbo âmâ bâleŋe miawakŋiŋbiap. ²¹Gâ galagaet nâŋgâ nâŋgâŋe gâlikowâtgât yâkgât akmâ soŋgo akto waiŋ tuŋe hâkâŋe akmenâ ârândâŋ akbiâp. ²²Aregât siâ me siâ hain aregât nângâm âmâ hangân yendâp are Anutugât metenân mem manmenâ gugaet biwigânâk yemiâp. Aregât siâŋe ikiŋaet nângâmbo ârândâŋ akto âmâ ikiŋe den âiân bo kalakto biwiŋe sândugembo heronŋe akmap. ²³Dâ siâŋe sot soŋgo hanokoagân nendo bâliwiap. Amâ hingât. Yâk Kristo nâŋgaŋdo huraguepŋe bo nângâm nemap aregât. Akto siâ me siâ are biwi kat kat olop bo aktenŋe dosaŋe olop akbiap.

Yesugât nâŋgâ nâŋgâ wadmâ manbaen.

15 ¹Galama, kârikŋe olop manmaen nenŋe âmâ yeukŋe manmai are sokom katyektenŋe ârândâŋ akbiâp. Sokom katyekmâ âmâ nenŋaet nâŋgâ nâŋgâ nenŋân bo maniâm. ²Nen galalupnenŋe yâk yengât nângâmâk âlepŋe akŋet akto Kristo nâŋgaŋbiâ humo agâkgât tânyenŋuniâm. ³Aregât keiŋe hin. Kristoŋe âmâ hainâgâk ikiŋe ukenŋe bo walep. Dâ Anutugât denŋande hin maktâp, “Anutu, gâ hâkâŋe dâm dâyi yâk yengât den are nâŋgât kaknân âgâep.” dâep aregât den walep. ⁴Are tâmbâŋe dondâ den makmâ kulemgoyi are Anutugât keiŋe nângâm heŋgemgone gât kulemgoyi. Anutugât kulemŋe hârokŋe mem kârikŋe mâŋginenekmâ mem owâinenekto siâ me siâ nengât pat dâtâŋe nâŋgâenŋe biwinenŋe owâiwiapgât kulemgoyi.

⁵ Anutuŋe kârikŋe aknengimapgât akto mem owâinenekbiap gât ambonande akyengimbo Yesu Kristogât dopŋân han nânġâ nânġâ konok akmâ manbaigât ulilaŋdân. ⁶ Ulilaŋdere akyengimbo han biwiyene mendugumbo Kembu Yesu Kristo yâkgât Eweŋe Anutu mepaiŋe mem manbai. ⁷ Aregât Anutugât kotŋe humo agâkgât Kristoŋe meyegep dop hain âgâk ye gala agaŋgim manbei. ⁸ Aregât hin makyenġiwe. Anutuŋe hakulupnenŋe den pat âlepŋe makmâ hengemgom makyenġiep are bunŋe miawagâkgât Anutuŋe amâ den bunŋeâk makmap a hârok nânġânġetgât Kristoŋe Yuda nengât akmâ hoŋ bawa aknengiep. ⁹ Hain aknengim amâ Yuda luâk âmbâle bo manmai yâkŋe Anutuŋe han kalemŋaet akyenġiepgât mepaiŋe mem heroŋe agaŋbiâ kotŋe agatbiâp. Aregât Anutugât denŋe bikŋe hin tatâp,

“Nâŋe Yuda luâk bo manmai yâk yeŋgât hutyeŋân kinmâ mepaiŋe mem kinmâ kep kom kotŋe patŋe makmâ egâlianġbian.”

¹⁰ Akto den siâ hin tatâp,

“Yuda luâk bo manmai yeŋe Anutugât kâmotlupŋe olop makmâ heroŋe maroŋe akbei.”

¹¹ Akto siâ hin,

“Yuda luâk bo manmai ye hârokŋe Kembu makmâ mepaiŋe membei. Dâ luâkŋe luâkŋe hârokŋe yâkgât akmâ owâiŋe agaŋbei.”

¹² Akto Yesaiŋe hin kulemgœp,

“Lâwin penâŋe Yesegât kâmŋe siâ miawakmâ yâkŋe Yuda luâk bo manmai damunyeŋe akto nânġaŋbiâ biwiyene owâiŋe akbiap.”

¹³ Galama, Anutuŋe biwi owâi aknengimapgât Amboŋe yeŋe nânġaŋigât akmâ wâtŋande totokoyekto heroŋe maroŋe nânġâmbiâ biwiyene sândugembo Heakgât kârikŋeŋe yeŋgimbo himbimgât nânġâm owâiŋe akmâ manmâ âgâwaigât ulilaŋdân.

Pauloŋe âi âlepŋaet mâruŋe agep.

¹⁴ Galalupne yeŋe han kalemyeŋe yendâp are akto Anutugât keiŋe âlepŋe nânġâm hengemgomai aregât yeŋak mem kârigeakbaigât bo pâpkowai. Are keiyene nânġâm hengemgoân. ¹⁵ Hain nânġân gârâmâ hanâk Anutuŋe han kalemŋaet niŋepgât den bikŋe meteâk kulemgom kinmâ Anutugât keiŋe nânġâyenġiân. ¹⁶ Yesu Kristoŋe Yuda luâk bo manmai yâk yeŋgât akmâ âi membiangât wâtŋe niŋep. Aregât akmâ Anutugât pat âlep denŋaet sumbegât âi mendere Heakŋe hanyenân han kâmdâk katyeŋgimbo Kembugât sumbe akbiâ Anutuŋe ekto ârândânġ akbiap. Amâ Yuda luâk bo yâk yeŋgât. ¹⁷ Aregât Anutugât âi meman are Yesu Kristogât akmâ nânġare agat agat akmap. ¹⁸ Âi are amâ nunaet kârikŋân wanŋande membom. Bo. Yesu Kristoŋe Yuda luâk bo manmaiŋe Anutugât lau lokowaigât wâtŋe niŋep aregât âi mem makyenġiman. ¹⁹ Akto kulem bo egekŋe keiŋe keiŋaet kârikŋe akto Heakgât kârikŋe

aregât akmâ Yerusalem kepiamba Kristogât keiŋe makmâ hân hârok ândeapmâ makmâ sambelem arire Ilurikon hânân ârândân agep. ²⁰Hain akmâ luâk bikŋe yengât âi kalamân gaetŋe membomgât Kristogât keiŋe bonângâmai ain kârikŋe akmâ makyenŋiwêrâm aktere humo akmap.

Pauloŋe Roma kepia ewangim Sipen ariwiapgât magep.

²¹Anutugât denŋe bikŋe hin tatâp. Aregât dopŋân akman, “Siâŋe yâkgât pat bo makyenŋimbiâ manmâ gayi yâkŋe yâk ekbai. Dâ yâkgât patŋe bo nângâm gayi yâkŋe yâk nânganbai.”
²²Den aregât akmâ yengâlân togowerâm kindere sop ârândân wan me wan siâŋe dâp tiginip. ²³Dâ manmâ gan ain yengâlân togowerâm hannande nângâm malân aregât akto hân iregen âine bo tatniŋdâpgât. ²⁴Sipen hânân ariwerâm akmâ yengâlân togowerâm nângân. Togom ye olop makmâ kârikŋeâk tân agum akmâ dâp heŋgemgom katnekiâ hepunyekmâ owâiŋeâk Sipen hânân ariwian. ²⁵Gârâmâ hinŋe âmâ Yesugât kâmot Yerusalem manmai yengât akmâ puli mem arim yengiwêrâm aktân. ²⁶Amâ hingât. Makedonia hân akto Akaia hânân gâtŋe Yesu nânganmaiŋe, Yesugât kâmot Yerusalem kepiam umburuk manmai yâk tânyenŋuwerâm owâim puli kali. ²⁷Amâ han kalem yenjaet akmâ katbiâ ârândân agep. Yuda luâk bo manmaiŋe âmâ Yesugât den pat amâ Yuda luâk yâk yengâlânba nângâyigât hâuŋe potatmâ yengimbiâ ârândân akbiâp. Hain dâm heronŋe akmâ puli kali. ²⁸Puli katbiâ huraguep are mem Yerusalem kepiam arim yengire bo akto Sipen hânân ariwiangât yengâlân soŋ togowian. ²⁹Aregât hin nângân. Nâ yengâlân siâ me siâ bâlâk bo togowian. Kristonŋe meme akniŋmap are mem togom yengire nângâm âmâ heronŋe maronŋe manbai.

³⁰Galalupne, Kembunenŋe Yesu Kristogât akmâ akto Heakgât han kalemgât akmâ ondop pâronŋ den makyenŋiwe. Ye nângât akmâ nâ olop Anutuŋe tânnuguâkgât wârakmâ Anutu ulilanbaen. ³¹Ye nângât ulilanbiâ âmâ Yuda hânân gâtŋe Anutu bonânganmai arekŋe menekbâigât Anutuŋe bâtyenânba mem oloŋnekbiap. Akto Yesugât kâmot Yerusalem ain manmai yengât akmâ puli kali are mem yengire ukenŋe agâkgât ulilanbei. ³²Hain ulilanbiâ Anutuŋe nângâyengim meme akniŋdo heronŋe akmâ yengâlân togom tatere biwi owâiâk akniŋbai. ³³Anutu lumbe Ambonŋe âmâ ye olop manbiâp. A bundâk.

Pauloŋe Roma yengât nângâyengim malep.

16 ¹Galalupne, âmbâle siâ kotŋe Poibe yâkŋe Yesugât kâmot Kenkereai kepiam manmai tânyengum manmap. Yâkŋe yengâlân togombo ye dowâk gala aganbai. ²Gala aganmâ Kembangât akmâ âmbâle arekŋe nâ akto bikŋe dondâ hoŋ bawa nengiep aregât wan me wan bo talaŋbiap are dowâk mem waŋmâ tângowei. ³Akto luâk âmbâi lâuwâ

Akuila akto Pirisila Yesu Kristogât âinjaet tân nugumandat yâk maŋgan yelekŋet. ⁴Yâk lâuwâ âmâ nâŋgât akmâ âi humo mem hâk hilâlâm nâŋgâm bâsok moyiat. Aregât nâŋjeak bo, Kristogât kâmot Yuda bo manmai kâmotnenŋe yâk yetgât okot âlep nâŋgâyetkim manden. ⁵Yâk yetgât emelan Kristogât kâmot mendugumai are nâŋgât akmâ maŋgan yekbei. Akto galane siâ kotŋe Epaineto Asia hân humo ain ulikŋân akmâ Kristo nâŋganŋep yâk gai maŋganbei. ⁶Akto âmbâle kotŋe Mariaŋe yeŋgât akmâ âi humo miep aregât yâk gai hainâk maŋganbei. ⁷Akto nâŋgât kâmolân gâtŋe lâuwâ Androniko akto Yunia ulikŋân nâ Kristo bo nâŋganŋân sop ain nâŋganŋiat. Akto beirâ tembe lokoŋe hiko negi sop ain hainâk katyelekbiâ nâ olop talion. Hain akmâ manmâ gambela nen Aposolo manmaen nenŋe yâk yetgât heroŋe akmaen aregât nâŋgât makyetkiwei. ⁸Akto nâ Humogât akmâ luâk siâ kotŋe Ampiliato yâkgât okotne nâŋgân aregât maŋganbei. ⁹Akto Urbanoe Kristogât âi meyionân olop miep yâk akto galane Sitaki maŋganyelektân gât makyetkiŋet. ¹⁰Apeleŋe Kristogât akmâ âi humo mem bo hâkân agep are nen hârok nâŋgâenŋe ârândân agep yâk akto Aristobulo yâkgât kâmot gai maŋgan yekbei. ¹¹Akto Yuda luâk galane Herodiongât akto Narikisogât kâmot bikŋe Humogât akmâ manmai yâk yeŋgât nâŋgâre âgâp aregât maŋgan yekbei. ¹²Akto âmbâi lâuwâ Tiripaina akto Tiripose Kembugât akmâ âi humo mem mandat, yâk akto âmbâle siâ Peasi arekŋe Humogât âi mem hâk hilâlâm nâŋgâep yâk hârok maŋgan yekbei. ¹³Kembuŋe luâk siâ kotŋe Rupu oloŋep yâk akto yâkgât memeŋe dop akmâ tân naguep yâk lâuwâ lâuwâ maŋgan yelekŋet. ¹⁴Akto luâk kotyene Asinŋkrito, Pilegoŋ, Hereme, Patoroba, Herema akto Anutugât kâmot bikŋe olop manmai yâk maŋganyekŋet. ¹⁵Akto luâk âmbâi lâuwâ Pilorogo akto Yulia akto luâk siâ Nereo akto gariŋe akto luâk Olumpa akto Kristogât kâmot yâk olop manmai yâk hârok maŋgan yekŋet. ¹⁶Yekai hainâk Kembugât akmâ bâtyeŋe koaŋŋiŋet. Akto hânŋe hânŋe Kristogât kâmot yâkŋe yeŋgât nâŋgâ yeŋgim mandâi.

Miti luâk hiangim yeŋgât sami magep.

¹⁷Galalupne, yeŋgât hutyeŋân gâtŋande ye umatŋân manmâ potalakbaigât gâlikoyekberâm akmai luâk are yeŋgât nâŋgâm heŋgemgom damun akmâ hamep akbei. Yâkŋe Kristogât keiŋe ye nâŋgâ meteyi are mem gulip kowerâm manmai aregât hamiyeŋgim yâk bonâŋgâ yeŋgiwei. ¹⁸Luâk hain arekŋe Kemu nenŋe Kristo hoŋ bawa bo agaŋmai. Âmâ yeŋaet tep yeŋaet nâŋgâmbiâ agato aregât hoŋ agaŋmai. Akto luâk âmbâle biwiyene bo damunŋe akmai yâk makyeŋgim mulun yekmâ heyeŋgimbiâ biwiyene gulip akmap. ¹⁹Dâ ye âmâ Kristogât den lokomai aregât patŋe kepia ârândân sambelem arimbo nâŋgâm meteyi aregât yeŋgât akmâ heroŋe akman. Heroŋe akmâ âmâ yeŋgât han

kau nânġâm hin akreġġat makyenġiwe. Siâ me siâ âlepġaet biwi owâi kakġân manbei. Dâ siâ me siâ bâleġande hâwât yekto âmâ bo nânġanġbei. ²⁰Ye hain akmâ manbiâ âmâ sop kâlep bo aktoân Anutu biwiyenġe sândugeâkġat amboġande Niambi keiyenġe amukġân hâkokombo tâliwai. Kembunenġe Yesu Kristoġat han kalemġe yenġâlân yembiâp.

Gala den.

²¹Galane Timoteo bât tângone akto Yuda kâmotlupne yenġâlân ġâtġe Lukio, Yasonġ, Sosipate yâkġe yenġât nânġâyenġiâi.

²²Akto nâ Teatio, nâ kulem ire Pauloġe makniġdo kulemġoân nânġe Kembuġat akmâ nânġâ yenġiân.

²³Gaioġe nâ Paulo akto kâmot hârok in tân nengumap hainâk yenġât nânġâ yenġiâp.

Akto luâk Erastoġe kepia ireġât puli damunġe akmap akto gala nenġe Koato yâkġe hainagâk aktat.

Anutu akto Nanġe Yesu yetġât kot humo.

²⁴Kembu nenġe Yesu Kristo yâkġât han kalemġe yenġâlân yem âġâwiap. A bundâk. ²⁵Anutugât pat âlep makman akto Yesu Kristoġat kot makmâ sambeleman, areġât dowân Anutuġe tânyenġuwiapġât bo pâpkomap. Akto kârikġe meyekbiapġât kârikġe talaġdâp. Anutu manman kârikġaet denġe amâ yoġâk yem gam malep âmâ hinġe miapġân miawagep. ²⁶Anutugât propetelupġande Anutugât den keiġe kulemgoyi talep are hinġe Anutu manman kârikġe Amboġande makto hânġe hânġe sambelem ariep. Amâ hânġe hânġe manmaiġe Kristo nânġanġmâ Anutugât lau lokowai ġât Anutuġe makto miapġân sambelem ariep. ²⁷Areġât Anutu ikiġe han nânġâ nânġâ humo talaġdâp konok are Yesu Kristoġat akmâ egâliaġne humo makmâ agandenne yem âġâwiâp kârikġe. A bundâk.